



832626

道光甲申閏秋



湘煙小錄

馬秋藥書

光緒丙戌莫春
上海王氏重雕

湘

錄



余曩時曾於友人處得見錢唐陳小雲司馬香畹樓憶語鈔本一種愛不忍釋亟向假歸手錄展玩迨乙酉冬武林假旋適膠城廣平明經寓申晨夕過從縱談藝事偶及憶語一書以未窺全豹爲憾越日明經手出一編見示題曰湘煙小錄亟讀之蓋卽向所手錄之憶語在焉此外尙有夢玉詞百餘闕并諸名流題辭證諸原序湘烟小錄其總名也神往十年願償一旦快何如之因念原板早燬勢將湮沒戴祝三大令亦酷嗜此書乃相與籌資重付手民書旣成細加校對悉與原板無異至欲論作者情文之妙題辭具在先得我心可不復贅時光緒十二年丙戌仲夏海上王維鋆旣堂氏誌於月圓人壽室

序

湘煙小錄者陳孟楷司馬悼其亡姬紫湘蒼其堂上家人所撰誄傳哀詞同人所製題詠洎司馬自著香畹樓憶語并舊作夢玉詞輯爲一編阮芸臺宮保取明凌忠介公所輯湘煙錄之意爲題今名紅繡弔影紫玉成煙奩史金荃未容擅美余識司馬久矣居忠孝心行仁義事深以其奉檄致親未得一第爲恨然審自筮仕以來南城節使彭城都轉諸公激揚嘆賞超倫軼羣且閣部孫奇圃先生有國士無雙之目河帥黎襄勤公有天下奇才之譽飛章交薦屢荷 特知當代柱臣不妄期許願皆傾心契重若此司馬之立身行政不于此可見哉是編爲追悼紫姬而作

序

夫姬以閨中弱質病不永年乃其賢孝淑慎人不間於重闈大婦之言翰墨詠歌斐滿吳會身後之名直軼諸朝雲絡秀而上苟非至性至情凝結感動亦斷不能享此文勲獨有千古昔琴牧子謂非董宛君之奇女不足以匹冒辟疆之奇男今以余觀孟楷紫湘之事遇奇而法事正而葩鄭重分明風槩既遠軼冒董卽就香畹樓憶語與夢玉詞筆墨而論尤非雉臯所及按湘煙錄原序所謂隻字艷千載單帙網四部按之有聲拂之有香者精冶淒豔庶幾匹之宮保巨眼題品獨眞世既有藝苑之張華余又何辭爲嗶引之輦叟乎若如入瓊逸客贊嘆曼翁雜記謂須用冷金箋畫烏絲闌寫洛神賦小楷裝以雲鸞縹帶貯以蛟龍

篋中薰以沉水迷迭于風清月白紅豆花開看之余謂移
品斯編庶不襲彼俊語質諸宮保當亦以爲知言也道光
甲申七月秋藥老人馬履泰書

序

二

廣平居士以梅垞生新譜影梅庵傳奇乞雲公子題詞俾
紆折玉之感。公子讀之益增悽恨。時距紫妹之仙去者十
日矣。閨湘請於公子曰。影梅庵憶語世豔稱之。然以公子
之才品遠過叅軍紫妹之賢孝亦踰小宛。且此段因緣作
合之奇名分之正。堂上之慈夫人之惠皆千古所罕。有前
日讀君家大人慈訓有曰。惜身心而報以筆墨。俾與朝雲
舊桃並傳。公子其有意乎。公子乃坐碧梧庭院。滴淚濡毫。
文不加點。隨時授余讀之。情文相生。悽豔萬狀。猶記紫妹
未字時。余嘗與豔雪翹雲韻秋贈香小燕諸人私語曰。箇
儂吹氣如蘭。奉身如玉。除是侍香金童。甫能消受耳。既見
公子爭慶得人。飲餞之夕。芳菲滿堂。皆曰。十妹此行何異。

登仙掛釵拂袖。多有感羨泣下者。迨妹今夏歸省。語及公
子恩誼。輒嘖蹙曰。薄命人惟恐消受不起。嗚呼。銘心刻骨
之言。孰料爲撒手離塵之讖哉。妹之病也。姊妹姨姨曾被
賙恤者。皆願以百身贖之。于其逝也。相向而哭。皆失聲。况
以公子憐香惜玉情之所鍾。其纏綿激楚。自有大難爲懷
者。然自有此作紫妹。旣在所必傳。村拙如閨湘輩。亦得廁
名簡末。此如淮南拔宅雞犬。皆仙公子之心。盡矣。紫妹之
靈慰矣。題曰。香腕樓憶語。仍影梅庵例也。世有牙曠譜入
宮商烏紗鈿鬢登場學步之時。吾不知此後賺人清淚。又
將幾許爾。甲申七月扶風閨湘居士揮淚謹書。

余家同懷十人。惟紫妹最幼最美。最才最賢。而難得者爲最孝。其居我生母之喪也。哀毀骨立。徒以老父在堂。未卽身殉。嫡母旣撫如所生。妹亦曲盡恭順。惟於背鏡倚枕。感念亡親。淚漬衾裯。歷數年如一日也。余聞其將有所適。歸叩其詳。妹曰。雲公子人品學問。有目共賞。母俟鄙言。聞其傳家孝友。天性過人。此尤妹所怍怍心動者耳。余曰。門高族大。契洽良難。以吾妹淑性處之。自無不宜。家宜室。惟是同母手足。目前僅我兩人。一旦睽離。深縈我念。今與妹約。別後如不暇搦管。覓一花一草。寄我。卽可知妹近狀矣。妹頷之。畫楫渡江。積旬。俾返。發函。伸紙。蛺蝶雙飛。弄翠。眠香。栩栩欲活。靈心飛動。喜可知已。今夏歸省。養病。歎然握手。

一

備述堂上之慈。夫人之賢。並聞雅孃龍媪云。此來舉室送行。潛然出涕。饋問之使。不絕於道。余方欣感交集。以爲吾妹之賢。孝旣有以上。契親心雖金鎗。馬麥定業。難逃。然人定勝天。造化或容。默挽耳。不虞曇花現影。落葉歸根。遽折連枝。使人痛絕。夫就妹生平。論之。蕙心。紉質。燕寢承歡。月滿花芳。玉郎專寵。家山重到。骨月全逢。旣親二老之顏。復告生身之墓。薤露素車之弔。備極哀榮。梨雲總帳之悲。靡間存歿。無毫髮之遺憾。無父母之貽懼。蘭緣旣盡。撒手以去也。固宜。惟聞父母告余云。公子以老親在上。力抑哀情。然淡旬以來。惟見以眼淚洗面。逝者如斯。生者如之。何垂垂鶴髮。感激涕零。嗚呼。吾妹縱脫愛緣。鑒此芳情。亦當似。

玉簫再世矣。余多愁善病。蕉萃中年。旣痛逝者。行自念也。
一燈如豆。三復斯編。感公子之情多。惜佳人之命薄。幽窗
冷雨。撲筆泣然。甲申巧月太原瑞蘭雪涕拜題。



紫湘誄

紫湘秣陵王氏女。年十九歸余子裴之爲側室。婉
嫵淑慎。門無間言。道光甲申七月四日。以疾卒。其
生平言行。旣見於余室人所爲小傳矣。余憫其有
柔嘉之德而早逝也。爲此誄以哀之。頤道居士記。
嗚呼紫湘。秉德淳貞。淮水之秀。鍾山之英。譬彼小星。以事
君子。大婦心怡。高堂色喜。吾家族大。食指逾千。同聲稱媿。
惟爾之賢。重親致歡。善承色笑。侍膳問安。惟爾之孝。佐饌
調藥。以事小君。夙興夜寐。惟爾之勤。言罔愆禮。行知飾性。
無違。夫子惟爾之敬。姬侍備此。令德克宣。允宜獲福。奚不
永年。翦紙招魂。采蘋設祭。我作此辭。潛焉出涕。

此書大正... 紫湘... 誄... 門無間言... 道光甲申... 七月四日... 以疾卒... 其生平... 言行... 旣見... 於余室... 人所爲... 小傳矣... 余憫其... 有柔嘉... 之德而... 早逝也... 爲此誄... 以哀之... 頤道士... 記。嗚呼... 紫湘... 秉德... 淳貞... 淮水... 之秀... 鍾山... 之英... 譬彼... 小星... 以事... 君子... 大婦... 心怡... 高堂... 色喜... 吾家... 族大... 食指... 逾千... 同聲... 稱媿... 惟爾... 之賢... 重親... 致歡... 善承... 色笑... 侍膳... 問安... 惟爾... 之孝... 佐饌... 調藥... 以事... 小君... 夙興... 夜寐... 惟爾... 之勤... 言罔... 愆禮... 行知... 飾性... 無違... 夫子... 惟爾... 之敬... 姬侍... 備此... 令德... 克宣... 允宜... 獲福... 奚不... 永年... 翦紙... 招魂... 采蘋... 設祭... 我作... 此辭... 潛焉... 出涕。

紫湘誄

紫姬哀詞

并序

錢唐汪端允莊

紫姬碧玉韶顏綠珠慧性家近青楊之巷門臨白
鷺之洲姊妹十人姬其季也畫徧十眉舊名花蕊
縮來雙髻小字桃根其歸我朗玉夫子也春江打
槳官閣飄鐙璧月凝輝前身定呼明月瓊花照影
幾生脩到煤花姬復性厭鉛華夙耽詞翰蘭羞佐
餽燕寢怡顏椒頰流馨鸞臺浴蕙潁川之門無歧
譽焉客冬余臥病殊劇姬竹苦哺糜含辛調藥中
宵結帶竟月罷妝余疾既瘳姬顏始解嗚呼賢矣
豈知瑤華萎雨瓊屑銷塵扶病歸省卒於母氏萱
幃雪涕蘭閣招魂羌渺渺兮予懷佇珊珊之入夢
瑤情玉色誰撰館陶仙子之銘霞袂雲軒待續寶
懿夫人之傳詩成八律淚綆千絲

淚灑西風黯碧紗。鈿蟬零落弔明霞。雲中紫鳳長離鳥。池

上天。桃薄命。花夜月。空林呼妙子。曉鐘殘夢見瑤華。疎星

三五光初掩。愁看銀河絡角斜。華譚妾石瑤華歿後見形如平生出抱朴子

蕊結同心九畹芬。渡江桃葉美人雲。畫眉菱鏡花雙笑。記

曲珠簾月二分。篆玉鴛鴦猶賸字。泥金蛺蝶尙留裙。早梅

官閣經行處。蓮屐蒼苔印碧紋。

月照香嬰畫閣虛。謝娘新詠麗芙蕖。棗花簾箔調鸚鵡。芸

葉窗紗辟蠹魚。紅衲道人工寫韻。白雲仙子最知書。蘭膏

翠羽留遺跡。奩豔重繙恨有餘。婦人集陸姬孟珠號紅衲道人何白雲史忠妾奩豔

董小宛輯

寒闈侍疾夜遲眠藥裹勞君細意煎彩勝倦簪挑菜節羅
屏靜掩試燈天解歌芳草朝雲慧潔奉蘭羞絡秀賢猶記
江城砧杵動春纖疊雪擘吳縣太夫人及余夫婦禦寒
襦袴類年皆姬手製
瓊肌病怯杏羅輕眉翠顰多晝未成虛幌藥烟愁擁髻小
窗花影罷吹笙金猊火冷香慵炷玉馬風馳夢易驚惆悵
紅冰凝別淚滿天梅雨闔閭城

皂莢橋邊問故家晚烏啼斷六朝花女墻靜夜潮初上水
榭新涼月正華銜到玉魚愁豆蔻撥殘金鳳怨琵琶退紅
衫子空裁製白蝶飛灰散曉霞

新月蛾眉憶晚妝淒風總帳泣歸航哀蟬落葉秋如水早
雁明河夜漸涼錦瑟驚絃懷夢草玉簫舊約返生香畫簾
微雨黃昏後誰念檀奴髻欲霜

女墳湖冷殯宮遙舊日妝樓鎖寂寥露砌碧苔吟蟋蟀風
廊翠竹網嘯蛸秋雲羅帕溫香漬明月瓊杯豔影消留得
玉梅遺掛在亭亭素質帶愁描秋雲羅帕見麗情集
明月杯見神仙傳

同作

管筠靜初

秦淮烟柳石城潮問訊青溪第幾橋仙子髻眉春黛染美
人衫袖落花嬌方期洛水霞長映何事嫌山雪易消惆悵
罡風吹太急一株玉樹隕南朝

金燈照夜月初圓往事分明在眼前香雪梅花曉妝閣烟
波桃葉渡江船相看大婦憐中婦豈料今年異去年蘭語

纏絲桃骨瘦憶來一度一潸然

江上青山隔翠微。白門楊柳夢依稀。空憐聽雨瀟瀟去。不見看花緩緩歸。四載玉顏成永訣。全家珠淚惜分飛。夜闌簾外天如墨。愁絕篝燈製殮衣。

黯澹文窗韻字紗。歸帆盼斷曲江涯。虎山尋夢烟初暝。鶴市招魂月正華。暫寄玉棺吳苑寺。待營香塚宋宮斜。舊桃坏土芳鄰在天竺。峯前弔落花。

又

陳華姬 萼仙

我弟才華小鳳皇。

余舊題弟婦允莊明湖飲餞圖句

得君亦復似鴛鴦。香

名謝氏烏衣巷。春色盧家白玉堂。一樹瓊花留豔影。滿庭璧月照明妝。如何絕代嬋娟子。零落嫣紅隕曉霜。

三

消息傳來掩淚聽。落花如雨葬傾城。青山會見營新塚。翠水應知理舊盟。瑤瑟前塵悲曉夢。玉簫後約望來生。一編憶語從頭讀。香碗樓頭碧漢橫。

又

陳麗姬 若仙

楊柳南朝樹。芙蓉北苑妝。衣裳雕玉珮。樓閣鬱金堂。桃葉春波穩。瓊花夜月涼。當年嫁張碩。親見杜蘭香。

隋苑通吳苑。頻年數往還。含香失寸趾。識曲謝雙鬟。纖柳銷春黛。天桃瘦玉顏。可憐扶病去。淒絕汝南灣。

滴淚空如水。傷心欲問天。魂歸殘月影。夢短落花煙。鸚鵡三生石。鴛鴦兩度船。玉簫情不斷。應結再生緣。

欽

定

一

傳

三
老
人
唐
彛
題

香和蘇，八小集原夏

香晚樓、人小景原夏寫

王刻場繪



紫姬小傳

天
情
詩

姬王氏名子蘭字紫湘一字晚君秣陵人。余子裴之側室也。初子婦汪端來歸生子孝如彌月殤。逾年又生孝先。婉後失調。體孱多疾。又因夫子頤道先生病劇。端誓願長齋繡佛三年。繼以選明代人詩初二集。聚書盈屋。晨書暝寫。心勞神疲。恒數晝夜不得寐。因請於余及頤道先生曰。端以庸質。作配高門。仰沐慈愛。有逾顧復。比得醒疾。終夜不寢。醫云疾在心神。不加靜攝。將成怔忡。自問幼耽墳籍。疎曠鍼藪。十饋五漿。尤非所諳。雖重親高堂。矜其不逮。夙夜循省。心何以安。且堂上膝下。僅止公子一人。含飴抱孫。亦止孝先一人。螽斯蕃衍。宜求淑儷。以主中饋。俾端得安心。

一

優游文史。以延孱弱之軀。並於祖翁先奉政公祖姑查太宜人前。再三言之。雖未即許。未嘗不鑒其心之苦情之摯也。嗣夫子以公至秣陵。聞姬賢。歸言之。端聞請曰。端之前言。實本肺腑。卽不爲公子求佳偶。獨不可置窈室乎。且紫姬詞翰。端曾一見之。尤非尋常金粉可比也。夫子乃稟命堂上。介同歲生侯君青甫。暨歐陽大令棣之爲蹇修。諏吉迎歸。端先期營香碗樓以居之。故又字晚君也。初至之夕。賓客雲集。姻眷俠侍。姬端秀靜穆。神光離合。若瓊花之照春。而華月之白夜也。余以久病。辟穀十稔。裴之嘗與端言。苟謀置筵。必得能侍。余疾者。姬至。逾月。輒屏鉛華。佐治內政。侍余尤盡心力。朝夕不離。余性畏雷。每頑雲屯空。驚電

擥影。裴之夫婦。輒在側。姬既至。裴之或以事他出。或在家。雖深夜。姬必先侍。余側也。上年春。余在揚病亟。姬焚香。籲天。請以身代。並代裴之持觀音齋。客冬。端病頭風。手不能持。七箸。醫者云。易傳染。語甚危。姬黎明起。不梳洗。不進飲食。先爲大婦敷藥。餽糜。撫摩抑搔。恒至深夜。衣不解帶者數月。端疾竟賴以愈。孝先自離乳哺。卽隨余寢食。雖孩提性方執。行坐有常所。不多言。言輒喜。作模稜語。婢媪不能通其意。姬喜愛若所生。佐余撫視。余因得晏息焉。余家世代寒素。服食樸簡。姬荆布粗糲。安之若素。以是尤得先奉政公歡心。去春。奉政公病。姬發願持淡齋。不食鹽豉。姬生母早卒。老父嫡母在堂。乞於上年十月歸省。並爲生母掃

墓。嗣遭奉政公大故。舉室南還。不克踐約。旣痛奉政公之見背。又感念生母。每夜分。輒悲泣。遂成嗽疾。中間侍大婦之病。已輒諱疾不言。泊余知之。延醫調理。甫少瘥。會余疾作。扶病侍。余坐窗前。適當風處。嗽疾復作。遂不可止。裴之始以治文案。濬河渠。襄鹽筴。獲巨臬。受知於節相孫公。黎襄勤公。爰會中丞韓公。奏請以通判留江南補用。已奉

特旨。准行矣。嗣以部駁。將赴都。請分發。姬謂裴之曰。君之冀留江南者。爲近侍堂上計也。今分發。則遠近不可知。慈闈多病。勢不能往。妾當在家。代君侍奉。至夫人之不能往者。亦勢也。君宜別求淑質。代佐內政。並言之。余以閨中人材難得。余病年來。亦漸輕減。且有姬人管筇。次女麗

姬侍余。勸慰之。屬勿萌是念。裴之先蒙

聖諭。更屬緝

捕。勤能感効。馳驅疊擒。梟盜去冬今夏。歷荷節相甄勞。復奏。又奉

特旨。以始終奮勉。

敕部先選。仰邀

異數。舉室銜

恩。孰知裴之將得官。而姬已先逝。耶。方

病之亟也。裴之馳書秣陵。招翁媪至蘇。存問慰藉。喜見顏色。疾以漸瘳。既病復作。自知不起。恐余之憂悸也。強自支

斷。言翁媪雖得見。而掃墓之願未遂。心恒耿耿。思力疾二

行。以畢所懷。且藉養疴。泣請數四。乃令裴之送之秣陵。將

逾月。會余以感冒攫疾。姬聞信。促裴之歸。泊有書來。輒言

病少愈。以安裴之心。裴之于六月二十二日至吳門。爲余

禱于元化先生祠。余病就痊。夢寐恒恍惚。幼穉言見姬歸

三

乃於七月初三日促裴之行。而七夕秣陵人至。則姬已於

初四戌刻逝矣。其歸也。若恐余之不任哀痛。而故遠之。其

逝也。若恐裴之親視。永訣之傷神也。而遠先之臨終。神氣

湛然。聞雷聲隱隱。猶念余不置。裴之本以初二日行。因家

中人爲製湖絲殮具。乃先遣僕星夜馳報。以慰之。適有以

水蜜桃餉者。余知其所嗜。命齋往。初五日至。而姬已逝。桃

實無恙。僅充靈座之供。裴之初六日至。則一棺長掩。殮具

已不及用。與芻靈冥楮。同付焚如而已。信至。太宜人以下

無不痛哭。失聲大婦尤哭之慟。夫子與余。請於太宜人。命

裴之攜柩至蘇。厝虎邱禪寺。奉政公靈輻側。俟奉政公歸

葬。同至西冷卜厝焉。姬數年來不易一衣。不製一釵。不私

蓄一錢。裴之衣服玩好。圖繪書籍。付收掌者。輒爲篋衍。小字記之。部別居分。不失累黍。性耽文翰。從裴之。夫婦受詩法。有寄公子揚州詩。自秣陵寄大婦吳門詩二篇餘。則斷楮殘編。與零膏冷翠。同盡矣。嗚呼。姬之未至也。知其美麗。不知其淑慎也。既至。知其淑慎。不知其勤儉也。久之。知其勤儉。不知其賢孝也。乃閱數年之久。而其賢孝之實蹟。以自晦而愈明。覺無事不入人心。脾矧余。沉疴委頓。十餘年。需人娛侍。得此賢孝之媛。而復失之。每一憶及。不知涕之何從也。因制淚和墨。作爲此文。俾後之覽者。知其槩焉。姬生于嘉慶八年癸亥七月十四日。卒于道光四年甲申七月初四日。生年二十有二。其卒也。夫子爲誄。裴之爲香晷樓憶語。大婦端管。姬筠。余大女華。次女麗。皆有詩論曰。古稱姬妾之賢者。若舊桃朝雲。皆以得侍文人。獲留姓氏。柔嘉之則。傳者勿詳。姬家金陵。六朝舊都。碧玉桃葉。豔蹟在焉。而姬之柔嘉。遠過舊桃朝雲。揆之載籍。殆絡秀之流。亞而惜其不永年也。悲夫。

道光四年歲次甲申七月中澣錢唐龔玉晨羽卿撰

甲申七月

香
陶樓
田
山
中
語

南昌萬承紀題

香
陶樓
田
山
中
語

光緒丙戌海上祝三校字

甲申七月

香畹樓憶語

丁丑冬朔。家大人自崇疆受代歸。籌海積勞。抱恙甚劇。太夫人扶病侍疾。自冬徂春。衣不解帶。蓂朮無靈。羣醫束手。余時新病甫起。乃泣禱於白蓮橋華元化先生祠。願減已算。以益親年。閩人允莊復於慈雲大士前。誓願長齋繡佛。並偕余日持觀音經若干卷。奉行衆善。乃荷元化先生賜方四十九劑。服之病始次第愈。自此夫婦異處者四年。允莊方選明詩。復得不寐之疾。左鐙右茗。夜手一編。每至晨雞喔喔。猶未就枕。自慮心耗體孱。不克仰事俯育。常致書其姨母高陽太君。嫂氏中山夫人。爲余訪置適室。余堅卻之。嗣知吳中湘雨佇雲蘭語樓諸姬。皆有願爲夫子妾之意。歷請堂上爲余納之。余固以爲不可。蓋大人乞祿養親。懷冰服政。十年之久。未得真除。相依爲命者。千餘指。待以舉火者數十家。重親在堂。年逾七秩。恒有世途荆棘。宦海波瀾之感。余四躅槐花。輒成康了。方思投筆。以替仔肩。滿堂兮美人。獨與余兮目成。射工伺余。固不欲冒此不韙。且綠珠碧玉。徒侈豔情。溫清定省。孰能奉吾老母者。采蘭樹蕙。此事固未容草草也。

金陵有停雲主人者。紅妝之季布也。珍其弱息。不異掌珠。謬采虛聲。願言倚玉。申丈白甫。暨晴梁太史。爲宣芳悰。余復賦詩謝之。曰。肯向天涯托掌珠。含光佳俠意何如。桃花扇底人如玉。珍重侯生一紙書。新柳雛鶯最可憐。怕成薄

倅杜樊川重來縱踐看花約拋擲春光已十年生平知己屬明妝爭訝吳兒木石腸孤負畫蘭年十五又傳消息到王昌催我空江打槳迎誤人從古是浮名當筵一唱琴河曲不解梅邨負玉京白門楊柳暗棲鴉別夢何嘗到謝家惆悵鬱金堂外路西風吹冷白蓮花此詩傳爲紫姬見之激揚贊歎絮果蘭因於茲始苗矣

孟陬下斡將游淮左道出秣陵初見紫姬於初秋水榭時停雲嬌女幼香將有所適仲瀾騎尉招與偕來余與紫姬相見之次晝燭流輝玉梅交映四目融視不發一言仲瀾回顧幼香笑述董青蓮傳中語曰主賓雙玉有光所謂月流堂戶者非耶余量不勝蕉姬偕坐碧梧庭院飲以佳茗

二

絮絮述余家事甚悉余訝詰之低鬟微笑曰識之久矣前讀君寄幼香之作纏綿悱惻如不勝情今將遠嫁此君誤之也宜賦詩以志君過時幼香甫歌牡丹亭尋夢一齣姬獨含毫蘸墨拂楮授余余亦怦然心動振管疾書曰休問冰華舊鏡臺碧雲日暮一徘徊錦書白下傳芳訊翠袖朱家解愛才春水已催人早別桃花空怨我遲來閒緜張泌妝樓記孤負鷓鴣期第幾回卻月橫雲畫未成低鬟攏髻見分明枇杷門巷飄鐙箔楊柳簾櫳送遂聲照水花繁禁著眼臨風絮弱怕關情如何墨會靈簫侶卻遣匆匆唱渭城如花美眷水流年拍到紅牙共黯然不奈閒情酬淺盞重煩纖手語香絃墮懷明月三生夢入畫春風半面緣消受

珠櫳還小坐。秋潮漫寄鯉魚箋。一翦孤芳。豔楚雲初從香。
國拜湘君侍兒解。捧紅絲。研年少。休歌白練裙。桃葉微波。
王大令。杏花疎雨。杜司勳。關心明鏡。團圓樂約。不信揚州月。
二分。姬讀至末章。慨然曰。夙聞君家重親之慈。夫人之賢。
君輒有否。無可人或疑爲薄倖。此皆非能知君者。堂上閨。
中終年抱恙。闕君鄭重之意。欲得人以奉慈闈耳。因卽席。
餞余詩曰。煙柳空江拂畫橈。石城潮接廣陵潮。幾生脩到。
人如玉。同聽簫聲廿四橋。月落烏啼霜濃。馬滑搖鞭徑去。
黯然魂銷。

湖陰獨游。新綠如夢。啜茗看花。殊有春風人面之感。忽從
申丈處得姬芳訊。倚闌循誦。紀之以詩曰。二月春情水不
如玉人消息。托雙魚眼中翠嶂。三生石袖底金陵。一紙書
寄向江船迴棹後。寫從妝閣上。鐙初櫻桃花澹。宵寒淺。莫
遣銀屏影。影疏。嗣是重親惜韓香之遇。閨人契勝璠之才。
牽芳結纒。促踐佳約。余曰。一面之緣。三生之諾。必秉慈命。
而行。庶免唐突西子。允莊曰。昨聞諸堂上云。紫姬深明大。
義。非尋常金粉可比。申年丈不獲與偕。蹇脩之事。六一令
君可任也。季秋八夕。迺挂霜颿。重陽渡江。風日清美白。下
諸山。皆整黛鬟迎楫矣。

六一令君將赴之江。新任聞姬父母言。姬雅意屬余。倩傳
冰語。因先訪余於丁簾水榭。詫曰。從來名士悅傾城。今傾
城亦悅名士。聯珠合璧。洵非偶然。余滯燕臺久矣。今自三

千里外捧檄而歸。端爲成此一段佳話。爾余袖出申丈書示之。令君掀髯曰。父母之命。媒妁之言。足爲麝蕪媚香。一輩人揚眉生色矣。旣以姬素性端重。不欲余打漿親迎。令君迺屬其夫人與姬母。伴姬乘虹月舟。連檣西下。小泊瓜洲。重親更遣以香車畫鷁迎歸焉。

姬同懷十人。長歸鐵嶺方伯。次歸天水司馬。次歸汝南太守。次歸清河觀察。次歸隴西叅軍。次歸樂安氏。次歸清河氏。次未字而卒。次歸鴛湖大尹。姬則含苞最小枝也。蕙綢居士序余夢玉詞曰。聞紫姬初歸君時。秦淮諸女郎皆激揚歎羨。以姬得所歸。爲之喜極淚下。如董青蓮故事。渤海生高陽臺詞句有曰。素娥青女遙相妬。妬嬋娟最小。福慧

雙脩論者皆以爲實錄。姬亦語余云。飲餞之期。嫺姬咸集。綠窗私語。僉有後來居上之歎。其姊歸清河氏者。爲人尤放誕風流。偶與其嫂氏閨湘玉真論及身後名。輒述李笠翁秦淮健兒傳中語曰。此事須讓十弟我。九人無能爲也。兩行紅粉服其詆譎吐屬之妙。

吳中女郎明珠。偶有相屬之說。安定考功戲語申丈曰。雲生朗如玉山。所謂仙露明珠者。詎能方斯朗耶。告以姬事。考功笑曰。十全上工。庶療相如之渴耳。蓋亦知姬行十故。以此相戲云。

余朗玉山房瓶蘭。先茁同心並蒂花一枝。允莊曰。此國香之徵也。因爲姬營新室。署曰香畹樓。字曰畹君。余因賦國

香詞曰。悄指冰甌。道繪來倩影。潄盡離愁。回身抱成。雙笑竟體。香收。擁髻離騷倦讀。勸拏芳人下西洲。琴心逗眉語。葉樣娉婷。花樣溫柔。比肩商畧。處是蘭金小篆。翠墨初鉤。幾番孤負。贏得薄倖紅樓。紫鳳嬌銜楚佩。惹蓮鴻爭妬。雙脩。雙脩漫相妬。織錦移春。倚玉紉秋。一時詞場耆雋。如平陽太守。延陵學士。珠湖主人。桐月居士。皆有和作。晚君極賞。余詞曰。君特叔夏。此爲兼美。余素不工詞。吹花嚼蕊。嗣作遂多。閩人請以夢玉名詞。且笑曰。桃李宗師。合讓掃眉才子矣。

閩中之戲。恒以指上螺紋。驗人巧拙。俗有一螺巧之說。余左手食指。僅有一螺。紫姬歸余匝月。坐綠梅窗下。對鏡理妝。閩人姊妹戲驗其左手食指。亦僅一螺也。粉痕脂印。傳以爲奇。重闈聞之。笑曰。此真可謂巧合矣。

五

蓮因女士雅慕姬名。背撫惜花小影。見貽衣退紅衫子。立玉梅花下。珊珊秀影。髣髴似之。時廣寒外史。有香畹樓院本之作。余因興懷本事。紀之以詞曰。省識春風面。憶飄鏗瓊枝。照夜翠禽啼倦。豔雪生香。花解語。不負山溫水軟。况密字珍珠。難換同聽簫聲。催打漿。寄回文大婦。憐才慣。消盡了。紫釵怨。歌場豔賭。桃花扇。買燕支閒摹妝額。更煩嬌腕。拋卻鴛衾。兜鳳鳥。髻子積雲乍結。只冰透鸞綃。誰管。記否。吹笙蟾月底。勸添衣。悄向迴廊轉。香影外。那庭院。姬讀之。笑授畫冊曰。君視此影。頗得神似否。乃馬月嬌畫蘭十

二幘懷風抱月秀絕塵寰幘首題紫君小影四字則其嫂
氏閩湘手筆是冊固閩湘所藏以姬歸余爲慶臨別欣然
染翰納之女兒箱中者余欲壽之貞珉姬愀然曰香閨韻
事恒慮爲俗口描畫余乃止

蕊香閣狂香浩態品爲花中芍藥嘗語芳波大令曰姊妹
花中如紫夫人者空谷之幽芳也色香品格斷推第一天
生一雲公子非紫夫人不娶而紫夫人亦非雲公子不屬
奇緣仙耦鄭重分明實爲天下銀屏間人吐氣我輩飄花
零葉墮於藩溷也宜哉芳波每稱其言輒爲歎息不置
捧花生撰秦淮畫舫錄以倚雲閣主人爲花首此外事多
失實人咸譏之余以公羈秣陵仲瀾招訪倚雲一見輒呼

六

余字曰此服媚國香者也仲瀾與余皆愕然時一大僚震
余名遇事頗爲所厄後歸以語姬姬笑曰大僚震君之名
而擠君倚雲識君之字而企君彼錄定爲花首也固宜

余受知於彭城都轉請於閣部節使檄理眞州水利並以
庫藏三十七萬責余司其出納余固辭不可公愠曰我知
子猷守兼優故以相托有所避就未免蹈取巧之習矣余
曰不司出納誠蹈取巧之習苟司出納必蒙不肖之名事
必於私無染而後於公有裨此固由素性之迂拘亦所以
報明公知己之感也公察其無他乃止時自戟門歸已深
夜閨人方與姬坐香晷樓翫月閨人詰知歸遲之故喜曰
君處脂膏而不潤足以報彭城矣姬曰人濁我清必櫻泉

思嚴以持已寬以容物庶免牛渚之警乎余夫婦歎爲要
言不煩

余舊撰秦淮畫舫錄序曰仲瀾屬爲捧花生秦淮畫舫錄
弁言倉卒未有以應也延秋之夕蕊君招集蘭語樓焚香
讀畫垂簾鼓琴相與低徊者久之蕊君叩余曰媚香往矣
桃花扇樂府世豔稱之如侯生者君以爲佳偶耶抑怨偶
耶余曰媚香卻聘不負侯生生之出處有愧媚香者多矣
然則固非佳耦也蕊君頷之復曰蘼蕪以妹喜衣冠爲湘
真所距苟矢之曰風塵弱質見屏清流願蹈泖湖以終爾
湘真感之或不忍其爲虞山所浼乎余曰此蘼蕪之不幸
亦湘真之不幸也橫波侍讌心識石翁後亦卒爲定山所

七

誤坐讓葛嫩武功獨標大節彌可悲已卿不見九畹之蘭
乎湘人佩之而益芳羣螳趨之而卽敗所遇殊也如卿淨
洗鉛華獨耽詞翰塵棄軒冕屣視金銀駟僧下材齒冷久
矣然而文人無行亦可寒心卽如虞山定山壯悔當日主
持風雅名重黨魁已非涉獵詞章聊浪花月號爲名士者
可比卒至晚節殞唐負慙紅袖何如杜書記青樓薄倖尙
不致誤彼嬋媛也僕也古懷鬱結疇與爲懽未及中年已
傷哀樂悉卿懷抱曠世秀羣竊慮知已晨星前盟散雪母
驕錢樹耶冒壁人弦絕陽春之音金迷長夜之飲而木石
吳兒且將以不入耳之言來相勸勉曰使卿有身後名不
如生前一杯酒嗟乎薰蕕合器臭味差池鵝鶩同羣嗟跽

不狎語以古今。能無河漢哉。蕊君沾巾。擁髻殆不勝情。余亦移鐙就花。黯然罷酒。維時仲瀾索序甚殷。蕊君然脂拂楮。請并記今夕之語。夫白門柳枝。青谿桃葉。辰樓顧曲。丁簾醉花。江南佳麗。繇來尙已。迨至故宮禾黍。舊苑滄桑。名士白頭。美人黃土。此余澹心板橋雜記所繇作也。今捧花生際承平之盛。聯裙屐之游。跌宕湖山。甄綜花葉。華燈替月。抽觴擲筵。之天。畫舫凌波。拾翠眠香之地。南朝金粉。北里煙花。品豔柔鄉。攄懷瑀翰。澹心雜記。自難專美於前。竊謂輕烟澹粉。間當有如蕊君其人者。兩君試以斯文示之。并語以聲。蕪媚香往事。不知有感于蕊君之言。而爲之結眉破粉否也。此一時佇興之作。忽忽不甚記憶。迨姬歸余後。允莊談次。戲余曰。君當日以他人酒盃。澆自己傀儡。興酣落筆。慨乎言之。苟至今日。敢謂秦無人耶。茗妹曰。兄生平佳遇雖多。然皆申禮防。以自持不肯稍涉。苟且輕薄之行。今得紫君天之報。兄者亦至矣。閨侶咸爲首肯。

秋影主人。中年卻掃。鑪熏茗盃。擁髻微吟。花社靈光。出塵不染。後來之秀。羸崇禮焉。先是香霓閣有隨鴉之舉。主人苦口箴之。聞姬屬余。慶得所歸。恒求識面。申丈介余。脩相見禮。笑曰。十君玉骨。珊瑚邇應。益饒豐豔。耶蘊珠抱璞。早審不凡。具此識英雄。俊眼尤爲掃眉。人生色矣。歸宜其言。姬爲莞爾。

邦當要衝。冠蓋雲集。余自趨庭問絹。日鮮甯暑。堂上於奇。

寒深夜命姬假寐。俟余姬仍翦燈溫茗。圍爐端坐以待。詰晨復辨色理妝。次第詣長者起居。夙興夜寐。歷數年如一日焉。

姬將適余。偶與倚紅聽春輩評次青容院本。或稱香祖樓警句。或賞四弦秋關。曰。姬獨舉雪中人。可人夫婿。是秦嘉風也。憐他月也。憐他數語。諷不輟。唐甥桂僊侍鬟。改子笑曰。十姑此時固應心契。此語金釵四座賞。爲知言。余前年于役彭城。寄姬詞有曰。蹋冰瘦馬投荒驛。負了卿憐惜。累卿風雪憶天涯。休說可人夫婿。是秦嘉。蓋指此也。嗣于下相道中寄姬詞曰。霜月當頭圓復缺。躍馬彎弓。那怪常離別。約了歸期。今又不關山。只認無啼鴉。何事沾膺雙淚。

九

熱帳下悲歌。竟未生同穴。忍與歸時。鐙畔說五更一騎衝風雪。南州朱夫人爲寫行看子。晚翠庵主卽書原詞于上。姬每一捧誦。感歎彌稔。淒咽之音。如聽柳絲芳草矣。

余幼涉韜鈴。長延豪俊。然如清河君之忠義廉立者。頗不易覩。長白尙衣。銳欲治梟。禁暴除害。致書閣部。謂燕趙壯士。江淮異人。恩威部勒。非余莫任。余啟閣部曰。無恒產而有恒心者。惟士爲能。雞鳴狗盜之雄。爲饑所驅。不知擇業。鋌而走險。患莫大焉。廣庇博施。知有不逮。然能儲一有用之材。卽可弭一無形之禍。閣部深嘉是言。且曰。卽以禽梟而論。以毒攻毒。兵法亦當如是也。忠信所格。景嚮孔殷。姬曰。鷹飛好殺。龍性難馴。膽大心細。願味斯言。且以余馭下。

少嚴淵魚。廩鼠察詰。不祥怡詞。異語肯得。韋絃之助云。
淮南以濬河停運。余請于堂上。創爲移摑之議。節使與彭
城公咸慶安枕。眞州賢士歌詩以侈美之。歸逼歲除。頗形
悶損。姬曰。儲課又民頌聲。洋溢殘年。風雪不負此行。那有
辜負香衾之憾。

蕪城綺節。慈命設讌。璧月樓前。姬偕閨侶。香堦俠拜。更解
綰臂。憐愛縷。遣鬟密置鴟吻。吾杭謂芻尼。窻以成梁。可渡
星河。靈匹也。萼姊戲裁冰。穀繪並頭蘭。桂畀姬。向月繡之。
鏤金錯采。巧奪鍼神。余巾箱檢翫珍。逾蔡氏金梭矣。
癸未仲春。太夫人患病危亟。姬輒焚香告天。願以身代。余
時奉檄駐工。星夜馳歸。禱于太平橋元化先生祠。賜方三
劑而愈。姬因代余持觀音齋。以報春暉。至歿不替。

十

姬與余情愛甚摯。而恥爲伎嫉之行。是以香影閣贈余鬢
花綃帕。香霏閣贈余冰紈雜佩。秋雯閣贈余瓜瓢繡縷。姬
皆什襲藏之。又香霏閣寄余雕籠蝸蠅一枚。姬尤參愛不
釋。曰。闌墻擲果。皆屬人情。苟非粉郎香掾。又誰過而問之
者。

余取次花叢。屢爲摩登所攝。爰賦柳梢青詞以謝之。曰。曳
雪牽雲。玉籠鸚鵡。喚掩重門。曲曲回闌。疎疎簾影。也夠銷
魂。愁看照眼濃春。添多少。香痕淚痕。默默尋思。生生孤負。
無數黃昏。休蹙雙蛾。鬢華倩影。好伴維摩。嬌倚香篝。話殘
銀燭。閒煞衾窩。更無人唱回波。只怕惹情多。恨多。葉葉花

花鵝鵝鵝。此願難麼。允莊曰。風流道學不觸不背。當是衆香國中無上妙法。姬曰。飄藩墮溷。千古傷心。君能現身接引。亦是情天善果。余曰。安得金屋千萬間。大庇天下美人。皆歡顏耶。姬亦爲之飄然。

余以烏鳥之私。懼官遠域牛馬之走。歷著微勞。黃扉辱國士之知。丹詔沐勤能之論。綸音甫逮。吏議

隨之絜養。噲恩未甘。廢棄長途。冰雪小隊。弓刀急景。凋年重嘗。艱險維時。允莊忽染奇疾。淹篤積旬。姬乃雞鳴而起。卽詣環花閣。褰帷問夜來安否。親爲塗藥。進匕後始理膏沐。扶持調護。寢饋俱忘。語余世母譙國太君曰。夫人賢孝。閨中之曾閔也。設有不諱。必重傷堂上心。而貽夫子

士

憂。稽首慈雲。妾願以身先之。爾余時寄蹟於東陽參軍絳雲僊館。曾附書尾寄以近詞。曰。年來飽識江湖味。今番怎添淒惋。遠樹蕪煙。殘鴉警雪。人在黃昏孤館。更長夢短。便夢到紅樓也。防驚轉。雁唳霜空。故鄉何事。尺書斷。書來倍縈別恨。道閨人小病。羅帶新緩。茗火煎愁。蘭煙抱影。不是卿卿誰伴。憐卿可慣。況一口紅霞。黛蛾慵展。漫憶揚州斷腸人更遠。姬時已得咯血症。諱疾不言。漸致沈篤。余以定省久睽。勾當猶畢。醉司命夕。風雪遄歸。而姬已骨瘦香桃。慙慙牀蓐矣。

余自吏議不得留江後。姬曰。君此後江湖載酒。宜豫留心。一契合之人。余詰其故。曰。君爲尊親所屈。奉檄色喜。自斷

不忍遠離膝下。但今既有此中沮。或者改官遠省。太夫人既憚長途。不能就養。夫人又以多病不去。我何忍侍君獨行。且寒暑抑搔。晨昏侍奉。留我替君之職。卽以攄君之憂。至君之起居。寒暖必得一解。事者悉心護君。雖千山萬水。吾心慰矣。此姬自上年十月以來。屢屢爲余言之者。孰知黃花續命之言。卽爲紫玉成煙之讖哉。

蓉湖施生。隱於閬闔。擲六木以決禍福。聞有奇驗。余就卜流年休咎。生曰。他事甚利。惟不免破鏡之戚。問能解否。曰。小星替月可解也。更請其他。曰。曄彼三五。或免遞及之禍。時平陽中翰自淮南來。爲姬推算。亦如生言。爰就鄰覲隴西氏占之。曰。前身是香界。司花僊史。艷金玉之緣。遂爲法

華所轉。愛緣將盡。會當御風以歸爾。允莊聞之。亟請於堂上。爲余量珠購艷。以應施生之說。余曰。新人苟可移情。輒使桃僵。李代。拊心自問。已覺不情。設令膠先續。斷香不返。魂長留薄倖之名。莫雪向隅之恨。更非我之所願。又豈卿之所安哉。允莊曰。然則如何而後可。余曰。姬素戀切所生。恒見望雲興歎。還珠益筭。此誠日者無聊之極思。然其徒倚繇延。屢煩慈顧。每與言及涕泗不安。曷以歸省之計。爲伊卻病之方乎。允莊領之。迺爲請於重闈。整裝以定歸計焉。

四月下澣五日。太夫人雪涕命。余曰。紫姬以歸省之計。爲卻病之方。果如所言。實爲至願。惟值江風暑雨。實勞我心。

汝可禱之於神以決行止。余因禱於武帝廟。其籤詩曰：貴人相遇水雲鄉。冷淡交情滋味長。黃閣開時延故客。驂駟應得騁康莊。太夫人見有驂駟康莊之語。以爲道路平安。乃許歸省。孰知三槐堂中。西偏楹帖。大書深刻曰：康莊驪足躡青雲。而姬歿後。停柩適當其處。開我西閣門。坐我綠陰牀。事後追思如夢。如幻。神能知之而不能拯之。豈蒼蒼定數。竟屬萬難挽回哉。

紫姬行後。允莊寄以詩曰：梅雨絲絲暗畫樓。玉人扶病上扁舟。釧鬆皓腕香桃瘦。帶緩纖腰弱柳柔。五月江聲流短夢。六朝山色送新愁。勤調藥裹剛離恨。好寄平安水閣頭。紫姬依韻和之。並呈太夫人詩曰：風雨經春怯倚樓。空江

如夢送歸舟。絲絲遠道花箋寄。黯黯臨歧絮語柔。聞福難消悲薄命。慈恩未報動深愁。望雲更識郎心苦。月子彎彎繫兩頭。允莊又寄余詩曰：問君雙槳載桃根。殘月空江第幾邨。淡墨似烟書有淚。遠天如水夢無痕。晚風橫蘅青谿閣。新柳藏鴉白下門。更憶嬋嫣支病骨。背燈擁髻話黃昏。余依韻和之曰：情根種處卽愁根。紗澣青溪別有邨。伴影帶餘前剩眼。捧心鏡浥舊啼痕。江城楊柳宵聞笛。水閣枇杷晝掩門。回首重闌心百結。合歡獨奉晨昏。曹小琴女史讀之歎曰：此二百二十四字。是君家三人淚珠凝結而成者。始知別賦恨賦。未是傷心透骨之作。

余于嚴慈抱恙。每禱元化先生祠。輒應。蓋父母之疾。可以

身代愚誠所結先生其許我也。姬人之恙或言客感未清積勤成瘵蚤投峻補誤于凡醫之手然求方之事余又遲迴不敢行六月十三日夜姬忽墜握余手曰君素愛戀慈帷苟不畏此簡書從無浪蹟久羈之事今來省垣者匝月矣閣部敘勲之奏昨日已奉恩綸指日北行亟宜歸

省妾病已深難期向愈支離呻楚徒愴君心願他日一紙書來好收吾骨以歸爾余時甫得大人安報因慰之曰子之賢孝上契親心來諭命爲加意調治以期痊可偕歸明日當爲子禱於小桃源元化先生祠冀得一當以紓慈厓姬泣曰拜佛求仙累君僕僕吾未知所以報也次日禱之未荷賜藥次日又以姬之生平具疏上達願減微秩以丐

古

餘生俾侍吾親謂先生其亦許我耶始荷賜以五色豆等味自此遂旦且求之至十八日晚得大人急遞書知太夫人客感臥牀姬亟呼鄭李兩姬盡力扶倚隱囊喘息良久甫言曰妾病已可起坐君宜過歸省親勿更以妾爲念言際清淚棲睫更無一言反面貼席若恐重傷余心者余時心曲已亂連泣頷之晨光熹微策單騎出朝陽門傷哉此日遂爲永訣之日矣

余於二十二日抵蘇太夫人之恙幸季父治少痊惟頭目岑岑迷眩五色余急禱于西米巷元化先生祠賜服黃菊花十朶遂無所苦太夫人詢姬病狀知在死生呼吸之際命余卽行余以慈恙甫愈請少留至二十六夜姬恩撫女

桂生驚啼曰孃歸矣詢之曰上香晚樓去矣太夫人疑爲
離魂之徵也隕涕不止余再四勸慰太夫人曰紫姬厭棄
紉綺宛然有林下風湖縣如雪則其所心愛也年來侍我
學製寒衣縫紉熨貼宵分不倦我每顧而憐之因屬世母
譙國太君庶母靜初夫人萼姊茗妹輩爲姬急製湖絳衣
履顧余曰俗有沖喜之說汝可攜去能如俗說留姬侍我
此如天之福也至七月朔日得姬二十八日寄書殷念北
堂病狀並遍詢長幼起居舉室傳觀方以無恙爲慰初三
製衣甫畢堂上促余遊行伏雨闌風征途迢滯初六觸炎
登陸曛黑入門家人兮悼惶嫂姪兮含悲易錦茵以牀垂
兮代羅幃以素帷魂飛越而足趨起兮心震駭而肝腸摧
撫玉琴之在御兮瞻遺挂之在壁懟瓊蓋之無徵兮恨朝
霞之難挹萃湫風以酸滴兮涉遐想兮髣髴太原翁姥流
涕告余曰兒于初四戌刻不及待公子而遽去矣嗚呼遲
到兩朝緣慳一面撫棺長慟痛如之何

五

姬之逝也太原翁姥專僣至蘇余於中途相左至十二日
僣自蘇歸齋奉大人慈諭曰七夕得三槐書知紫姬遽然
化去重闈以次無不悲悼且屈指汝到相距兩日未必及
視其斂尤爲傷心之事攜去衣履想已不及附棺汝母云
是所心愛可焚與之汝一切料量安妥後卽載其櫬回蘇
暫厝虎山後院俾依汝祖靈以居今冬恭建先塋當并挈
之以歸爾渠四年中賢孝盡職羣無間言去冬侍汝婦之

疾尤屬不辭。況瘁至其淡泊甯靜。夙爲汝祖所稱賞。今得首從先人於九京。在渠當亦無憾。汝母方爲作小傳。靜初允莊等皆有哀詞。汝宜愛惜身心。報以筆墨。俾與菑桃朝雲並傳。當亦逝者之心也。嗚呼我堂上慈愛之心。無微不至。開函捧誦。感激涕零。昇太原舉家讀之。莫不淒感萬狀。余因恭錄一通。并衣履焚之。靈次嗚呼。紫姬魂魄。有知雙目。其可長瞑矣。

姬髮長委地。光可鑿人。指爪皆長數寸。最自珍惜。每有操作。必以金彊護之。彌留之際。鄭媪爲理遺髮。令勿輕棄。更倩閩湘。盡翦長爪。并藏翠桃香盒中。閩湘曰。留以遺公子。耶含淚點首者。再叩其遺言曰。太夫人愛我甚。至起居既安。必命公子復來。惜我緣已盡。不能少待。爲恨爾。

太夫人素性畏雷。余與允莊紫姬。每逢夏夜風雨。輒急起整衣履。先後至太夫人房中。圍侍達旦。今年七月三夕。姬病臥碧梧庭院。隱聞雷聲。輒顧李媪等曰。恨我遠離。不能與主人同侍。太夫人爾未及周辰。遽爾化去。病至。縣。憒。而。其愛戀吾親。若此悲哉。痛哉。

允莊聞姬凶耗。寄余書曰。姬之恩撫女桂生。已奉慈命。爲持三年之服。至其平日愛撫孝先。無異所生。業爲持服。如有弔者。應報素柬。亦已請命堂上。可書嫡子孝先稽顙云。云。并寄挽聯曰。四年來孝慕無忝。偏教玉碎香銷。愚夫婦觸境心酸。遺憾千秋。豈獨佳人難再得。兩月中消息雖通。

只恨山遙水遠。慈舅姑倚閭望。切芳魂。一縷願借公子蚤同歸。同人歎爲情文相生。面面俱到。芳波大令曰。素柬以嫡子署名。吾家庶大母之喪。先大父太守公會一行之。今君家出自堂上。及大婦之意。尤爲毫髮無憾。

金沙延陵女史。工詩善畫。秀筆軼倫。所得潤筆之資。以贖老母幼弟。九工劍術。韜晦不言。人以黃皆令楊雲友一流目之。不知爲紅線隱孃之亞也。病中聞紫姬之耗。厲書於余。發函伸紙。上書萼綠華來無定所。杜蘭香去未移時。一聯跋曰。紫湘仁妹。蕙心紈質。曠世秀羣。余每見於蕪城官舍。愛不忍去。曾仿月嬌遺蹟。畫蘭十二幀。以作美人小影。今聞彩雲化去。不覺清淚彌襟。以妹之孝恭無忝。具詳允

莊大妹所撰挽聯。人不聞於高堂大婦之言。無俟再下轉語。爰書玉溪生句。俾知慧業生天。以攄雲弟梨雲之感。此於香祖樓後。又添一重公案矣。又一行曰。姊以病中腕怯。不得縱筆作書。可覓一善書者。捉刀爲幸。余因倩汝南探花。仿簪花妙格。書之吳綾。張諸座右。此與昭雲夫人篆書林顰卿葬花詩。以當薤露者。可稱雙絕。

詞壇耆雋。羸錫哀詞。攄余愴情。美不勝屈。至挽聯之佳者。猶記扶風觀察云。別夢竟千秋。金屋曇花逢小劫。招魂剛七夕。玉簫明月認前身。巢湖太守云。司馬濕青衫。蓋世奇才。那識恩情還。獨至。脩蛾歸碧落。畢生寵遇從。知福慧已雙脩。高平都轉云。玉帳佩麈符。曾見潞州傳記室。蘭臺拋

鳳管空教司馬憶清娛。清河觀察云倚玉塞芳記伊人瓊
樹雁行花葉江東推獨秀。叱鸞靡鳳送吾弟金閨鸚薦風
沙冀北歎孤征。渤海令君云迎來鸞扇女美前程。月滿花
芳奈銀屏月缺花殘蕉萃煞鏡裏情郎畫中愛寵歸去鵲
橋仙生別離山迢水遞賴錦字山溫水軟圓成了人間艷
福天上奇緣渤海清河兩君有寒脩葭葦之設撫今悼昔
故所言尤爲親切及見申丈挽聯云公子固多情也爲伊
四載賢勞不辭拜佛求仙欲把精虔迥造化佳人真有福
堪羨爾一堂寵愛都作香憐玉惜足將榮遇補年華僉曰
離恨天中發此眞實具足語白甫此筆眞有鍊石補天之
妙又鵲湖居士用余丙子年題鐵雲山人無題舊作曇花

六

妙諦參居士香艸離騷弔美人之句書作挽聯既見會心
又添詩讖釵光釧響觸撥潸然

姬疾革夜語其季嫂繆玉眞曰我仗佛力歸去當無所苦
公子悼我第請以堂上爲念扶持調護宜覓替人公子必
義不忘我皈向者要不乏人耳玉眞泣陳如此余方淒感
欲絕鴻消鯉息洵有如姬所云者於虜紫姬來去湛然解
脫愛緣消搖極樂幸勿以鄙人爲念所悲吾親無人侍奉
所喜吾兒漸已長成承重蔭之孔長冀門祚之可寄余則
心芽不茁性海無波且願生生世世弗作有情之物矣
余自姬逝後仍下榻碧梧庭院翠桃香盆泣置枕函空牀
長簟冀以精誠致之然顰目炯炯恒至嚮晨雖有鴻都少

君之術似亦未易措置也。猶憶七月四日蘭陵舟夜夢姬笑語如平昔。寤後紀以詞曰。喜見桃花面。似年峇招涼待月。竹西池館。豆蔻香生新浴後。茉莉釵梁暗顫。恰小試玉羅衫軟。照水芙蓉迷艷影。問鴛鴦甚日雙飛慣。低首弄白團扇。星河欲曙天。鷄喚乍驚心。蘭舟聽雨。翠衾孤展。重翦銀鐙溫昔夢。夢比蓬山更遠。怎醒後蓮籌偏緩。謾訝青衫容易濕。料紅綃早印曉痕滿。荒驛外五更轉。時堂上屬瑯琊生偕行。讀之歎曰。此種筆墨。無論識與不識。皆知佳絕。惟覺淒惋太甚耳。余亦嗒然孰知蘭陵入夢之期。卽秣陵離塵之夕。帳中環珮是耶非耶。其來也有自其去也又何歸耶。腸迴目極心酸淚枯。姬儻有知亦當嗚咽。

九

姬素豢狸奴名瑤臺兒。玉雪可念。余初訪碧梧庭院。輒依余宛轉不去。姬酒半偶作諧語。閩湘紀以小詞曰。解事雪狸都愛你。眠香要在郎懷裏。是也。泊姬歸省。閩湘猶引前事相戲。姬逝後瑤臺兒繞棺悲鳴。夜臥茵次噫嘻物猶如此。余何以堪。

姬冰雪聰明靡不淹悟。類多韜匿不言。先大父奉政公夙精音律。藻夏蘭宵。季父恒約僚客于玉樹堂。坐花觴。月按譜徵歌。奉政公北牕跛脚。顧而樂之。芙蓉小苑花影如潮。一抹銀牆。邃聲隱隱。姬遙爲某闕。某誤按之不爽。累黍邗江樂部。夙隸尙衣。歲費金錢億萬計。以儲鈞天之選。吳伶負盛名者咸驚焉。試燈風裏。選客稱觴。火樹星橋。魚龍

曼衍五音繁會芳菲滿堂。余於深宵就舍詢姬今日搬演
佳否。姬輒微笑不言。蓋太夫人素厭喧囂。圍鑪獨酌。姬虞
孤寂。占袖侍旁。雖慈命往觀。低徊不去。以是徹夜笙歌。未
嘗傾耳。腐目。余今後聞樂。拊心哀過。山陽鄰笛矣。

姬如出水芙蓉。不假雕飾。當春楊柳自得風流。太夫人恒
太息曰。韶顏穉齒。素服澹妝。秀矣雅矣。然終非所宜也。壬
午初夏。婪尾嬌春。將侍祖太君爲紅橋之游。萼姊茗妹輩
爭爲開奩助妝。璧月流輝。朝霞麗彩。珠襦玉立。豔若天人。
隴西郡侯眷屬。時亦乘鈿車來游。遇於篠園花際。爭訝曰。
西池會耶。南海游耶。彼奇服曠世骨象。應圖者當是采珠
神女。步蘅薄而流芳也。計姬歸余四年。見其新粧炫服。祇

此一朝而已。羅襟臙粉。繡袿餘香。金翠叢殘。覽之隕涕。

三

姬最愛月。尤最愛雨。嘗曰。董青蓮謂月之氣靜。不知雨之
聲。尤靜。籠袖熏香。垂簾晏坐。簷花落處。萬念俱忘。余因賦
香碗樓坐雨詩曰。翦燭聽春雨。開簾照海棠。玉壺銷淺酌。
翠被罽餘香。惻惻新寒重。沉沉夜漏長。宛疑臨水閣。無那
近斜廊。清福艷福。此際消受爲多。今春香碗樓坐月詞。則
曰。蟾漪滌玉人影。天涯獨鏡。檻妝成調。鈿粟應減。舊時蛾
綠。歸來夢斷。關山卷簾。暝怯春寒。誰信黛鬟雙照。一般孤
負。闌干又香碗樓聽雨詞曰。夢回鴛瓦疎疎響。鐙影明虛
幌。爭禁此夜客天涯。細數番風。況近玉椽花。比肩笑向巡
檐索。怕見簷花落。傷春人又病。慳慳。拚與一春風雨不開。

簾蕭黯之音自然流露雲搖雨散逸若山河從此雨晨月夕倚枕憑闌無非斷腸之聲傷心之色矣尺對進無餘以樗散之材受知于閤部河帥節使都轉暨瑯琊延陵兩觀察河渠戎旅不敢告勞然出門一步惘惘有可憐之色迨過香巢益縈別緒淒懷釀結發爲商音猶憶壬午初秋下榻碧梧庭院寄姬蕪城詞曰新漲石城東雪聚花濃迴潮瓜步動寒鐘應向秋江彈別淚長徧芙蓉金翠好房櫳燕去梁空開窗偏又近梧桐葉葉聲聲聽不得錯怪西風又于紉秋水榭對月寄詞曰深閨未識家山路淒淒夜殘風曉霧濕湘鬢寒禁翠袖曾照銀屏雙笑紅樓樹杪怕隱隱迢迢夢雲難到萬一歸來屋梁霜霽畫簾悄憑闌愁

見雁字問書空寄恨能寄多少水驛燈昏江城笛脆絲鬢催人先老團欒最好況冷到波心竹西秋早待寫脩蛾二分休瘦了香影閣主人讀之憮然有問曰此時此際月滿花芳偶爾分襟愴懷如許陽關三疊河滿一聲惻惻動人聲聲入破用心良苦其如淒絕何余初出於不自覺聞此乃深悔之頻年斷梗轉眼花影事如塵愁心欲碎玉溪句云此情可待成追憶只是當時已惘然霜紈印月錦瑟凝塵斷墨叢煙益增碎琴焚研之恨

余去秋留江姬喜動顏色曰妾積思一見老親並掃生母之墓君今晉省應官堂上命妾待行得副夙懷雖死無憾余訝其不祥亂以他語會先大父奉政公病余侍側不忍

遠離幕僚。僉言既受節相河帥厚恩。亟宜謁謝。姬曰。兩公當代大賢。以君爲天下奇才。登之薦牘。此其儲才報國之心。非欲識面臺官拜恩私室者。且君以侍重親之疾。遲遲吾行。又何歉焉。嗣奉政公以江淮苦澇。宜效馳驅。促余挂帆。溯江西上。閣部審知奉政公寢疾。仍允告歸。姬曰。吾聞聖人以孝治天下。閣部錫類之心。洵非他人所及也。嗣此半月。姬與余隨同諸大人侍奉湯藥。姬獨持澹齋不食鹽豉。焚香禱佛。奉政公卒以不起。然此半月中。余得隨侍湯藥。稍展烏私。皆閣部之所賜也。八月下潞。余遽被議。九月中旬。舉室南還。而姬歸省掃墓之願。知不克踐。旣痛奉政公之見背。又復感念生母。人前強爲歡笑。夜分輒嗚咽。不已。十月中。余又奉檄涉江。歷淮。姬獨侍大婦之疾。半載以來。幾于茹冰食蘖。嗚呼。傷心刺骨之事。庸詎者尙難禁受。況茲裊裊亭亭。又何能當此煎迫哉。

七月二十日。與客坐紉秋水榭。恭奉太夫人慈訓。曰。紫姬之逝。使人痛絕。傷心弔影。汝更可知。以汝素性仁孝。於悲從中來之際。想自能以重慈與我。兩老人爲念。寄去姬傳一篇。據事直書。不計工拙。聊據吾痛。無侈無飾。當之者亦無愧色也。謹展另冊視之。洋洋將二千言。淚眼迷離。不忍卒讀。時玉山主人驚湖居士在座。歎曰。紫君賢孝宜家。不知者或疑君抱過情之痛。今讀太夫人此傳。始知君之待姬。洵屬天經地義。實姬之嫩行。有以致之。爾蕙綱居士曰。

紫姬之賢孝。堂上之慈愛。至性凝結。發爲至文。是宇宙間。有數文字。紫君得此。可以無死。國朝以來。姬侍中一人而已。嗚呼。紫姬。余撰憶語千言。萬語不如太夫人此作。實足俾汝不朽。郁烈之芳。出于委灰繁會之音。生于絕弦彤管。補靜女之徽。黃絹銘幼婦之石。嗚呼。紫姬。魂其慰而而今而後。余其無作可也。

客讀香晚樓憶語或謂過情或疑踰禮余憮然有間曰此非深知朗玉之言且非至性至情人語也凡人篤于一倫者五倫皆厚漓于一倫者五倫皆薄余識朗玉久矣見其髻齡致歡重親頤養孝友之譽門無間言且觀堂上疾劇齋心涕泣焚香告天誓請身代以故每禱華元化先生祠賜藥療疾如響斯應弱冠投筆仰承仔肩淮泗近遊亦有嚙指心痛之感其篤于事親者如此淑儷允莊夫人閨中之秀也弦詩鼓瑟靜好孔嘉嗣以待堂上之疾長齋繡佛與君別居宏願旣畢編選明人詩集復得心耗不寐之疾屢爲君訪置造室君皆堅卻之四年異處怡悅相莊其篤于相內者又如此哲弟小英早慧而殤君悼之甚哀集中哭荀弟詩及哭從弟仲華諸詩潘芝軒尙書嘆曰斯人性情獨摯故其理學獨醇顧君以同懷早世獨抱四海蒼茫之痛恒曰惟朋友足以補昆弟之闕故其友誼爲尤篤尊人頤道先生爲當代龍門憐才下士清宦廿年室嘗屢空而君解衣指困赴義若渴憶余自己巳冬因婁東蕭君晉卿識君時君方從蕭丈子山遊明年晉卿死君念蕭丈之無嗣也請于堂上爲置側室未幾生一女而蕭丈遽下世遺腹復生一子送死養生力肩其任呱呱遺孤賴君成立同時以父執而訂忘年交者曰大興舒丈鐵雲曰嘉興王丈仲瞿舒丈有三子長孟皋次仲舒最幼卅角者余始不知其字乙亥冬舒丈居母喪柴毀骨立除夕漏四下君猶

手煎參湯以飲之而丈終以哀毀卒君爲理其喪輯其稿
月卹其家迄今十年矣其間孟皋仲舒先後居頤道先生
幕中復先後以疾卒君日以舒氏嗣續爲慮凌芝泉明經
者金陵之詩人也病廢廣陵與君喬梓素無一面交頤道
先生宰江都嗣其家者三年洎先生以憂去官明經遂失
志以死適君以今秋蒞揚阮梅叔明經語凌凶耗君往唁
其家全家哭拜于地君慨然曰存歿之事在吾無憂購地
葬芝泉于平山之麓且爲封樹題其碣曰清故白門詩人
凌芝泉先生之墓請命于頤道先生挈其全家來吳並爲
舒氏營新居卽以凌氏幼女配舒氏少子侍萱君母龔太
夫人以次各撤衣理助妝汪劍潭資政文中有云憫詩人

二

之薄祚冰上傳言遷壽母以同居橋邊賃廡佳兒佳婦互
承二老晨昏江北江南并作一家眷屬讀者皆爲感嘆泣
下所謂舒子侍萱者卽余昔見其巾角無字者也舒于王
爲中表親仲瞿丈與鐵雲丈才旣相匹配亦相同丁丑新
秋仲瞿丈病于吳中華嚴庵君日往視其疾丈固曠逸不
羈有宇宙遺廬之意君毅然曰君有眷屬在杭使君生後
猶抱羈旅天涯之感吾他日何以對君嗣哉專僦飛棹送
丈歸里并豫爲料量身後事丈竟得遂首邱遺孤善才迄
今提掖不少倦距王丈之歿蓋亦九年于茲矣吾吳人才
輩出多與君交善咸以所學就正于頤道先生先生獎成
後學惟恐不及始有吳門七子之目繼有後七子續七子

之稱就所見先後爲序不以年位學問相軒輊禱昧如余
因亦得廁名其間而此二十一人中英年碩學以王君井
未爲巨擘今秋遽以疾卒君爲籌其後事甚至王母曹太
夫人流涕語人曰吾兒交多賢豪長者死友惟陳司馬一
人而已余攷范文正忠宣父子麥舟助葬千古傳爲美談
今君喬梓助人營葬就余所知者舒蕭諸丈而外余舅氏
彭甘亭先生秀州吳丈澹川并葬其全家五棺王柳村徵
君賦詩以記其事此外待君舉火者有婁東桂氏吳中許
氏秀州陳氏金陵翁氏蓋亦指不勝屈君初無德色無惰
容曰吾少承庭誥出事友生第視吾力之當盡以求吾心
之所安恩怨升沉非所計也夫君子綱紀倫彛之際皆出

三

以纏緜悱惻之思旣已頑懦可立豪傑可興况乎紫姬之
歸君也以姬姜而備令德賢孝淑慎百喙同聲積勤成瘵
猝然化去仰事俯育失此良佐親悼于堂婦痛于室而謂
君能漠然置之匪特無是情亦必無是理也且聞君之蹇
修爲侯外翰歐陽大令外翰年逾五旬無子君爲置筮舉
雄外翰賦詩誌喜今襁褓者三齡而外翰年亦六十一歲
矣大令去冬因公事幾被吏議去官舉室倉皇乞援于卅
年之舊雨某觀察某置不答君爲借箸而籌大令始得無
恙報蹇修者如此其待姬者可知然苟非姬之至性至情
天欲玉女又何以見兩美之必合哉且夫移孝作忠理無

二致齊家治國教本同原是故明玉致親奉檄雖屈資郎

其議駱馬湖之租地也吳省庵觀察嘆爲能持大局能識大體其論淮南北之鹽筴也錢子壽都轉稱爲公輔之器王佐之才其佐理真州水利暨擒治梟盜也曾賓谷節使顧謂王簣山觀察曰如陳丞者可謂材兼文武矣相國孫寄圃先生旣以國士無雙待之河帥黎襄勤公又以天下奇才目之連銜入告屢荷

恩綸始

諭緝捕勤能繼

諭始終奮勉一介書生傳家忠孝而果受

特知若此聖經所謂治民必獲乎上者非卽誠身明善順

四

親信友之所推暨哉書有之云王道本乎人情夫非人情者有二不爲至愚陋則爲大奸慝彼爲過情踰禮之說者旣不樂成人之美而其自待亦正復不厚是非公論所在余不欲默爾而息也爰走筆書于簡末以告後之讀是編者

道光甲申孟冬吳沈秉鈺跋于吳中懷雲亭

紫湘主人哀詞卽題朗玉司馬自撰香晚樓憶語夢

玉詞後

儀徵阮亭梅叔

翠墨檀郎苦費才桂旗蘭旆渡江來可憐香晚樓前月還
照淒涼玉鏡臺

池開出斷腸花
香名賢孝說全家贏得慈闈淚似麻雪盈冰桃靈座供西

曾識羞蘭詠絮來梨雲仙夢返瑤臺珮環留得珊珊影應
種香墳萬樹梅

傳家忠孝挹清芬紫玉成煙豔紫雲重見湘煙編小錄楚
天瑤瑟弔湘君

湘煙錄爲明凌忠介公所輯裔孫鳴喈重刊乞雲臺兄爲撰弁言今司馬以憶語小傳暨自著夢玉詞刊成一編雲臺兄題曰湘煙小錄此于金荃奩史之間又添一重翰墨緣矣

香晚樓主人哀詞

太原辛絲瑟嬋女史

掃眉才子是名姝骨應相知豔應圖雲海仙山長恨傳金
堂蘭室莫愁湖搗衣砧杵憐中婦盤石筌篋憶小姑何處
潛英少君石餘香紫帳浥蕪蕪

蕪城新秋驚聞晚君妹金陵之計寄此奉輓並慰朗

玉弟吳中

嶺南黃之淑耕晚女史

記從官閣見瑤華玉鏡新妝麗曉霞畫出蛾眉二分月簪
來蟬髻六朝花靡蕪隋苑遲春燕楊柳蘇臺隔暮鴉江北
江南成小別經年消息望天涯

豈料長離逝女牀瓊枝消息斷金堂紫釵入夢銀鐙暗鈿

遂回波水檻涼翦爪心堅來世約招魂詩蕪返生香玉簫

再見尋常事好念高堂兩髻霜

奉題朗玉弟香碗樓憶語後

溧陽宋 鑽 北臺

經世才名杜牧之焚香跌坐寫烏絲梨雲影事分明在一

卷淒涼夢玉詞

捧檄關河雪滿裾朝雲珍重數行書影梅庵裏論前事忠

孝文章恐不如

一家眷屬同僊佛妙語都從慧業成留得千秋佳話在優

曇小現已長生

奉輓紫湘主人卽慰朗玉兄悼懷

元和 蔣志疑 澹懷

上蒼浪天下泉壑佳俠含光宅冥漠神仙眷屬蘭蕙叢一

點蛾眉月吹落瑤姬淪謫顏如霞作賸名闕儀柔嘉藥鑑

經卷不駐影展如之媛悲舜華金闈夫婿才奇俊鳳靡鸞

叱畢生恨錦瑟華年去莫追玉簫再世緣難問切利光音

攤妙鬢銀河耿耿佩珊珊嬋娟自有千秋在可奈情天補

石難

紫湘主人仙逝金陵行館茲當歸旆製此奉輓以摠

朗玉弟愴情

南城 陶焜午 香泉

梁州新郎 湘波千尺湘花一逕辜出傷心人影竹風梧雨

幾番淒切曾聽見說歸帆催去急騎飛來總是無膠境問

新詞誰唱斷腸聲吹送瑤天紫鳳笙秋蕭瑟人孤另可憐

宵記照花枝並思鄭重忒分明

前腔 一丸螺墨一甌新茗博得蘭闈心肯香君去後幾人

能飲香名只有河東末路小宛中年一樣憐才症記紅橋
同聽玉簫聲寵柳嬌花列畫屏藍橋約黃姑聘笑他家錯
守溫郎鏡千載遇一時情

前腔換頭

伴幽蘭素影娉婷照明蟾一天淒警佳人不壽

天公原算多情况有高堂愛篤夫婿緣深大婦生同命趁
黃楊先厄足了平生到七夕秋河別恨成冬郎憊秋娘病
甚楊枝婀娜紅綃詭調錦瑟怨湘雲

節節高

熒熒曙後星夢耶醒算他生未卜今生定朝雲誅

絡秀名看宜稱鸞箋留得檀奴詠鴛情更向蓮臺證落葉
哀蟬不須聽紅牙代譜相思令

尾聲

因緣不隔人天信把一姓名香禱玉京還指仗此去

江神保護悄魂影

讀朗玉弟湘煙小錄綴成韻語代寫哀思

吳縣

葉廷琯 茗生

紫玉西風遽化煙霜禽情海恨難填誰知香草靈均感詩
識先成十載前

定情本事最風華傳遍青溪姊妹家醉倚玉梅聽俊語可
人夫婿是秦嘉

煙江催放木蘭舟到及蕪城正晚秋一樹瓊花摹豔影美
人端合住揚州

澹掃修蛾月二分孤芳那用異香熏篠園春讌歸來後疊
損泥金簇蝶裙

寒衣鍼綫及秋忙小隊弓刀送玉郎風雪天涯能報國
幾曾翠黛怨凝妝

問疾晨昏侍祖庭齋心禱佛乞延齡千秋賢孝多名媛至
性尤難是小星

寒閨大婦病纏綿藥裹深宵手自煎甘作東風桃李代心
香一瓣祝瑤天

翦蝶殷勤寄故鄉翩翩自喜勝鴛鴦那知易醒梨雲夢雙
宿雙飛命不長

願佐蘭閨奉老親報郎豈在侍征輪綠窗記取殷勤語要
覓清娛作替人

春來小病學維摩骨瘦香桃冷翠蛾蕉萃檀奴相伴處玉
簫淒咽洞仙歌

歸省親闈強自寬人天從此路漫漫石頭城下無情水送
過明妝送玉棺

玉女投壺紫電輝房櫳永夜侍萱幃最憐病榻聞雷際夢
裏還思化鶴歸

粉盞脂奩浥淚痕妝樓深鎖月黃昏盈盈素旆空江外縹
緲先歸倩女魂

江國新涼雨又風待郎來已掩殘紅更無通替能相見落
葉哀蟬一哭中

愁見蘇臺拂柳絲歌離弔夢早秋時雙鬢掩淚瑤笙咽怕
唱淒涼夢玉詞

影臺愛聽雨瀟瀟更翫涼蟾倚綺寮此後弦秋孤館夜剪
鐙何忍種芭蕉

昨歲吳門畫舫回虎山清梵暮雲開前身香界司花史環
珮還依古佛來

香晚樓頭月自明蕭郎孤影坐殘更一編寫就傷心史便
抵奇香蕪返生

玉色瑤情絕妙詞江南詞客弔蛾眉哀言別創千秋例二
老文章大婦詩

秋榭微波冷翠屏歸舟重泊短長亭銀牋拈出傷心句遠
笛哀秋可耐聽

明玉歸舟紀事詩云總帳銀燈闇畫紗香
魂猶幸共天涯傷心五月初三夜曾訪蘭

陵孝女花又虎山即目詩云親拓羅屏拂暗塵勞卿替我
侍重親昨宵香晚樓前月恨少凭闌擁髻人荒寮誰拾紫

五

蘅香鶴澗酸風起白楊紅淚紙灰飛茜雪乞卿殘茗酌
眞孃哀豔淒戾不忍卒讀附記于此以補憶語之缺

奉慰朗玉弟卽題香晚樓憶語後太倉顧瞻元意秋
聞指星橋訂會期如何小別卽長離魂銷梨苑停雲夜夢
斷蘭陵聽雨時遺挂珊珊人似玉迴腸曲曲鬢將絲鸞箋

贏得傷心語勝勒梅花墓上碑
仲兄書來知朗玉兄有清娛之悼譜寄解連環一闋

以抒哀思

長洲王嘉祿井叔

渡江桃葉頓傷心望斷一作眉殘月料夜深水榭新秋對

明鏡無言素娥初別綠去閃流螢悄凝想畫羅衣褶更紅

衾浸水翠燭作飄煙抱去影淒絕丁簾暮潮恨咽問丁

孃十作索前事休說記倚闌同翫雙星正竹一作插瓜分露

涼時節一去霎人間但怨指銀河痕滅定空房暗塵墜響
夢疑繡屨

朗玉兄自京江舟次郵示近作悼香碗樓主人臺城
路詞四闋纏綿往復悱惻芬芳讀之使人心骨俱消
當與飲水諸作並有千古紫君得此可以無憾爰依

原調再題二解寄以奉慰

長洲 王嘉祿 井叔

板橋誰分絲絲柳重來但牽秋怨柱雁凋金屏蛾墜粉總
作今生腸斷羅幃夜短恨瀟碧如煙夢嘯難喚不耐紅鸚
畫簾風悄尙催卷 江樓空記送別甚樓高在望人竟天
遠玉冷消肌珠枯瑩睫莫是郎歸猶盼蘭舟又返料怯怯
香魂背鏡尋徧欲認愁痕海綃清淚淺

六

最消魂事無過別人天況成長恨瑣屑眠餐殷勤冷煖一
種傷心誰問尋思更忍儘子夜歡聞變歌淒緊眠寫蠶眠
翠牋重疊去怨難盡 空江孤夢易醒正紅闌采伴頻寄
芳訊月瘦琴心煙寒鏡約莫遣華年愁損歸帆盼準好同
話相思夜償秋閨更與銘香彩鸞傳韻本

題朗玉司馬所撰香碗樓憶語後卽寄汪允莊女甥

錢塘 張 襲 裘 未

一夕罡風悵落花檀奴揮淚哭天涯香銷蘭畹吳宮月夢
冷楓林楚岫霞碧漢殘星愁駕鵲白門疎柳怨嘯鴉真靈
位業知誰是翠水西頭萼綠華

傳來憶語護靈芸卻扇曾看月二分南國愁過桃葉渡西

湖待築菊香墳塵封鈿盒拋銀甲燭暗羅帷冷畫裙多病
枕書憐謝女斷腸新咏弔朝雲

一 朗玉弟有朝雲之感自製臺城路數闕攄其愁懷以
蘇辛之高亮寫姜張之幽遠覺文通別恨二賦尙有

遜其淒怨處因復倚聲代寄餘意 寶山 毛嶽生 生甫

秦淮幽恨埋無地垂楊半隄秋水鏡篋霜飛簾鉤月冷多
少明眸如此金釭暖紫怕消瘦郎腰墜鬟重理脉脉香塵
舊歡如夢更餘幾 殘荷珠淨午洗記添香夜坐鈿映花
麗寶帳寒憎瑤梳浣怯魂小闌昏愁倚亭亭瘞矣付篁綠
啼禽亂熒幽隧暗憶猶憐洞簫知怨起

朗玉兄自製臺城路四闕哀感頑豔一往情深依調

七

卽題香晚樓憶語後以攄愴情 吳縣 戈 載 寶土

紫雲修到神仙眷罡風頓教吹散璧月凝輝瓊花照影合
向璇閨長伴情天夢短想小別青溪倩魂先斷兩日遲來
不堪重對舊庭院 餘香尙留素晚墜歡收拾起閒付斑
管金屋三年玉 平 簫再世絮果蘭因都幻瑤編細展認字
字相思淚珠彈滿夜雨空樓珮環聲未遠

又集朗玉兄澄懷堂舊句得七絕十六章桂枝崑玉

遠勝鄙人自作也 吳縣 戈 載 寶土

一 紙書來墨未乾 送沈 式如 休文善病帶圍寬 無題 之三 總帷彈指

人何在 夢綠軒 試茗 錦瑟憂橫未有端 與仲文 夜話

聞道金閨第一流 陔華堂贈 許周生 珮環歸去莫山秋 吳蘭雪重 修寫韻樓

返生術少香難炷

哭舒鐵雲之三

石不能言佛也愁

拂水

滿湖秋雪不開門

西溪秋泛同馬秋藥

洗盡臙脂舊淚痕

白秋海棠之一 遙

見小樓紅一角

梨雲閣題壁

東風吹墮落花魂

琴娘曲和王仲瞿

樓外湘簾卷玉鈎

江南碧雲天

遠憶靈修

簪花詩之三 捧花歸侍

如來座

芳苓精舍觀荷

又作紅塵一度游

歸鶴亭詩

畫檻移牀露氣侵

玉太古齋聞笛

霜鴻嘹唳候蟲吟

聞砧 南朝舊是

傷心地

題倚雲亭填詞

萬種秋酸一寸心

蕭湘夜雨篇

不料傷心事竟真

哭蕭晉卿

牽雲曳雪豈無因

小除夕示王井叔 蓬山

昨夜罡風急

曉山謠

贏得高歌泣鬼神

虎邱倉聖祠

花月多情杜牧之

題改七齋少年聽雨

清寒况味幾人知

自題供硯

鳳羅紙寫神傷賦

玉鈎斜憶到

呵花貼髻時

青溪夜雪

乘風有日到蓬萊

無題之四

消得清游第幾回

和賦

花外立

題人面桃花院本後

海棠紅向鏡中開

明玉山房即事

畫檻雕楹半夕陽

重游安瀾園

瑣窗今夜夢蕭湘

荻秋館題壁 庭前

剩有青楊樹

自題胥江折柳圖

不待攀條已斷腸

江亭秋柳

瓊樓人憶小游仙

自題滄溟醉月圖

竹化啼痕玉化烟

蕭湘夜雨 夢斷

湘臯風雨夕

湘臯一花

一因緣

五臺山金蓮花

何處秋心逗笛家

香影閣聞笛

西窗細雨落簷花

春雨

寞尙相憶

明玉山房對月

遙指銀灣降羽車

七夕

簫局熏留昨夜香

香晚樓小病

羅衣禁得十分涼

西爽閣

啼破游仙夢

春曉

萬樹桃花葬夕陽

孤襟薄醉之四

三十工愁髻已華

花朝與畢子筠

畫屏銀燭譜琵琶

簪花詩之二

淚珠

洗面將終日病起東一酸寒泉薦落花風雨

叢鈴碎珮不逢人閨中四酒醒天寒獨愴神鷗隱園見梅花勤與

扶持雙白髮病起玉樓珍重苦吟身題鐵雲見和無題詩後

珠玉遙天咳唾寒寄朱環之林鳥淒咽草蟲酸題遺硯樓詩集一編珍

重千秋想題歸珮鴟血模糊未忍看哭仲華弟

笑我年來太瘦生題香蘅館吟鈔牆東誰按紫鸞笙聽雨銀牀墜葉

邀題句春雨長廊與孫子和涼入松風竹雨聲西溪秋泛之三

朗玉弟有晚君之悼寄示臺城路新詞哀豔淒戾殆

不自勝因和二解以寫其哀長洲王嘉福二波

青谿最數排行小芳名試掄纖指翠鈿凝妝烏衣卜宅早

壓蘭姨瑤姊亭亭瘦紫但手折芙蓉怨彈湘淚幾劫司花

九

種情香界證前世秋期會記俊賞羨三生豔福簾訪丁

字碧玉能諧黃衫許作信有傾城名士歸飛燕子恁重到

金堂夢寒香墨未抵愁深莫愁湖上水

洗車重灑天孫淚傷心竟逢秋閨碧漢初涼黃楊共尼誰

識人間長恨香蘭翠隕甚一翦同心夢中開盡寂寞妝樓

步虛歸聽佩聲隱空閨魂斷月去影又初三下九凝望

爭忍小扇辭螢生衣散蜨卻怨紅香猶潤愁腰瘦損怕濕

徧青衫易消詞鬢莫倚回關早寒風露緊

題香晚樓憶語調寄虞美人長洲曹佩英小琴

秦淮穉柳嬌無數第一柔條數成陰肯向大隄邊只有玉

驄緩緩許搖鞭秋江雙槩蘋波軟桃葉迎如願司花消

受福三生無奈風旛偏聽落花聲

玉鉤望斷穿鍼夕忍說黃楊厄人間天上一般秋只是生
離死別兩般愁 十行清淚鸞牋洗影事從頭記千秋水
繪要同傳祇恐影梅還遜影蘭緣

題朗玉兄湘煙小錄調寄菩薩蠻 吳縣 徐尚之 仲文

簫鸞寫韻傳仙匹 葢宮又見瑤姬謫 鸞牋話蘭因 一時三
玉人 嬋娟驚豔福國色宜金屋 桃葉渡江雲珠簾月二
分

藥鑪經卷檀奴瘦 傷心語怕難消 受乞護並頭蓮 慈雲大
士前 蘭緣何太短 翠旄秋江遠 銀漢待吹笙 乘風返玉
京

淒涼四闕臺城路 銀箋珠淚拋無數 影事淚重彈 定情菩
薩蠻 香名賢更孝 只此人傳了 福慧况雙修 語君休淚
流

斷腸贏得才人語 曼殊月上都歸去 紅雨舊桃墳 相依倩
女魂 鈿車人擲果 芳意如何可 么柱覓鸞膠 只應逢玉
簫

陳孟楷通守副室王碩人哀辭 吳縣 曹 堉 稼山

年月日吾兄陳孟楷之副室王碩人卒于秣陵及是孟楷
攜其篋歸厝于虎邱祖殯之側重親以下哭咸失聲姑彰
以傳婦痛以詩翼翼矜矜式瞻清懿宜孟楷之情過其分
哀逾于禮矣今以所撰湘煙小錄示余為辭余讀之哀感

頑豔情文相生攬其經寃鮮不優喏按碩人姓王氏諱子
蘭字紫湘別字晚君上元人也玉英韞德蘭性揚芬孟楮
以羊車璧人拾蘅皇翠羽渡江畫楫誤指神仙卻扇新詩
豔傳吳會雖坤靈之作合有因亦窈窕之心神獨契也大
婦允莊夫人夙擅閨房之秀金釵奉贄青綾解圍璿韞女
宗簫鸞僊侶碩人則維參一點愛劬纖阿子霞三年長侍
玉局太原女士辛瑟嬋聞之歎曰國香國士晚君得所歸
矣藝苑侈稱閨娥旁妬冒董麗談不是過也矧以慧心能
佐內政纖悉手規中外心服孝恭淑慎尤爲太夫人所鍾
愛焉大婦體瘳忽遭異疾撤環侍藥以身顙天婉婉內傷
美疾外劇然猶施殢自諱恐傷慈懷省親金陵逾月遂卒

年二十二也嗚呼悲哉孟楮哀絃播音愛河溢淚影堂二
展在東不猶國風兩篇召南欲廢撰清娛之行實屬楚挽
手吳蒙不獲禮辭藉抒側感辭曰

江水源碧鍾山氣青珠旒琯閉玉蘊娉媿變彼娉媿豐容
盛鬋未勝鴉鬟輒鴛雀硯宛宛明豔曳曳輕容薄彼晁采
歸我元龍車走六萌星避五角郎倚玉人婦營金屋高堂
愉愉愛憐婉淑何意嬋媿獲此奇福鳴房比德在公兼師
然脂捧硯裁紈答詩焚篤禱香抽排比卷臨池花簪論難
鶯囀妾咏半格郎手一編門茶覆掌弦琴比肩子京燭後
馬融帳前趾牙可想勝趣異焉豔者旣多妬者亦衆司化
忌才矜瑰告夢婦適疴作侍疾忘身婉變素腕遂罹其屯

美質若金沉疴若火以火鑠金如何而可省親告墓偶歸
建康一葉舸送百里帆張燕燕有句迢迢報章下仰嬪則
上言高堂卽其至情允協天相何圖沉綿英英雕喪入帷
月白肅帳風淒花泣泣露烏嘯驚飛蘭息一絲藥烟幾縷
含淚波收斂蛾魂舉旆檀滿室簫管躡虛生有慧業歿其
仙與嗚呼哀哉歲蕤餘芬卽旋未歇通替無棺遣挂有篋
宜我孟楷酸悲愴魂所撰憶語琅琅萬言自非瀝思何能
極筆影梅瑣瑣不足稱述嗚呼哀哉焚聚窟而不返兮過
姓邱而淚漣歎陰宮之紂絕兮侖形籛之依然何以慰靈
光于三泉兮有伐石而勒志播瑤華于千秋兮尙感興而
涕泗

題湘煙小錄後

華亭王燕生 凝香
女史

共惜芳華起暮愁月華涼照舊妝樓靈筵吳苑冰桃供遺
恨銀河七夕秋

西風梧葉滿庭前鶴駕瑤臺玉化烟賢孝蘭闈名共仰從
來不朽卽神仙

寄題小雲司馬香畹樓憶語後

汪端光 劍潭

兩代宗工世早傳鯉庭名播仲華年一門禮法兼詩教中
婦溫柔大婦賢

傳來消息墮瓊枝司馬青衫濕可知好熟瓣香叅轉語玉
簫應有再生時

侍宦都門驚聞姨母紫湘夫人之訃雪涕抒哀謹題

香畹樓憶語後

河東張儀昭 鳳卿
女甥

春色烏衣巷幽芳最小枝梨雲嬌粉靨柳黛染修眉夫子
鵝鸞彥佳人冰雪姿煙江桃葉漿官閣菊花卮婉孌瓊枝
影團欒璧月詞鳳樓賡雅韻燕寢洽柔儀珠箔飄燈夜銀
屏賭酒時隨肩拜金母奉手侍風姨蘭室承優誼香車恨
遠辭燕雲牽別夢湘草寄遐思忽返瑤清駕傳來碧落碑
青衫人似玉錦瑟淚如絲黃閣交章薦紅塵四牡馳京華
情話處芳樹有餘悲

臺城路一闕和孟楛弟哀逝之作

震澤趙 函 良甫

工愁洗馬吟愁向空階絮聞蛩怨水咽秦淮雲蘿白下一

雲曇花易散靈香裊斷恨不共郎歸怕教郎見撒手珠宮

三

幾番留語玳梁燕 初秋重到舊館記迎來畫幟低擁羅

扇寶瑟流年寒簧待月鏡裏輕鸞輕換湘煙夢幻算負了

今生玉清仙眷欲寄相思碧天無早鴈

題小雲司馬湘煙小錄後調寄如夢令

吳縣石韞玉 琢堂

才子又逢才耦不讓女君獨秀替月是明星誰料匆匆分

手希有希有問勝影梅庵否

小雲司馬兄寄示湘煙小錄情文交摯使人不忍卒

讀才華衰減勉題四絕以博破涕之笑

昭文孫原湘 子瀟

打槩迎來絕代姝六朝山色作眉圖量珠未許論身價只

向郎君索慧珠

匆匆小劫散鴛鴦贏得全家爲斷腸天遣文章新樣出班
姬史筆傳丁嬈

雙飛烏鵲獨飛回消息驚從白下來第一人間難得事若
蘭親哭趙陽臺

一死爭知絡秀賢情花淚葉滿湘煙朝雲嫁得才人堦誅
筆何曾有老泉

寄題小雲司馬香晚樓憶語後

昭文席佩蘭道華女史

夫婿專城坐上頭雙鬟倩影共銀甌舊稱才子如何遜新
得佳人字莫愁小病偶還桃葉渡離魂先返稻香樓影梅
前夢淒迷甚忍捲湘簾月一鉤

十四

開到江南陌上花更誰緩緩度香車雙飛烏鵲星前誓一
曲清溪夢裡家緣注玉簫仍眷屬愁縈錦瑟促年華鬱金
堂小尋行跡淒淚彈紅上碧紗

寄題朗玉弟湘煙小錄後

金壇吳規臣香輪女史

金雁棲塵酌翠釭玉蟲炮蕊黯銀釭柳絲烟鎖愁凝水桃
葉春寒夢渡江花落餘香猶戀樹月沉殘影尙留窗碧鈿
瑟瑟無消息惆悵青琴擁鳳雙

瓊樹經霜隕一枝青谿殘篷雨絲絲簪花小影摹雙髻攬
鏡新妝憶十眉萼綠華來無定所杜蘭香去未移時玉谿
識語分明在記取湘烟本事詩

事見香晚樓憶語

題小雲夢玉詞後

吳江郭麐頻迦

清潤潘郎玉琢同新詞如水氣如虹如何才載松陵道便
對青春葬小紅

小劫匆匆八十過自知綺語夙生多老來黃九風情減未

要當場鐵秀訶

余自被焚詞集
遂矢不復作

奉題香畹樓憶語後

吳縣
鈕樹玉 匪石

空谷香方吐瓊樓夢已非柔嘉良不易婉變孰能希竹淚
迷湘浦霜風捲素帷一編傳憶語足以表音徽

題小雲司馬湘煙小錄後

仁和
錢 棻 次軒

驚心錦瑟感長年司馬情懷倍黯然淑行應增賢女傳芳
魂合證大羅仙才工吟咏詞編玉性淡鉛華佩撤鈿香畹
樓空鸞鏡缺難教重覓再生緣

五

從來慧業種瑤瑛那識朝華每易傾千古詩人同此恨一
家哀誄共憐卿花殘吳苑淒涼曲潮落秦淮嗚咽聲莫謂
紅顏都命薄天爲賢孝播嘉名

題小雲司馬湘煙小錄後

永康
熊方受 介茲

相隨簫史住秦臺莫道天公不愛才三十三番圓月夜也
會雙照玉人來

耐得閨中子細看杏花妍麗菊花寒分明豔福兼清福怪
底詩人消受難

非常賢孝更誰儔淒絕人間香畹樓何待徧徵名士筆一

門哀誄足千秋

公子悲秋欲問天情癡併怕再生緣此中多少傷心境我

已先嘗廿二年

奉題朗玉司馬尊兄湘煙小錄後

太倉徐元潤少掖

江芷江蘼悟夢緣清商彈碎七條弦
蘼蕪秋影靈均淚一卷離騷欲化烟

牙管雙花倚玉臺秋池紅葉感難裁
絕奇錦瑟鍾情話卻費閨中織錦才

兩槩秦淮送別舟風風雨雨秣陵秋
吳兒莫道心如石不待言愁我已愁

佳俠香名滿色絲江南唸徧誅花詞
翻憐海外朝雲墓不乞晁黃本事詩

題小雲司馬兒香畹樓憶語後

江都吳椿退旃

優曇暫現亦因緣腸斷銀河七夕前
消得全家斑管麗朝雲才調本如仙

文章經濟早知名錦瑟華年悵月明
香畹樓頭兒女淚英雄本色是多情

奉題朗玉兄湘煙小錄後

錢塘張之杲東甫

一編記恨墨縱橫添得秋人雪鬢生
絕似當年白太傅結之片石泐芳名

白詩太湖石上鐫三字十五年
前陳結之結之香山妾桃葉字也

最是高堂傳一編寫來至性語纏綿
然脂誰續傷心史讀

向秋窗絕可憐

蛾眉福慧比朝雲大婦賢柔世罕聞
一自白門鸞信杳淚

痕先漬石榴裙

返魂香少命如何小劫情天一剝那花上露偏難耐久閒
愁空自感宜哥宋黃子思哭愛妾宜哥詩
恩同花上露留得不多時

奉題小雲司馬兄湘煙小錄後江都張鴻書開虞

石頭城畔柳絲絲夢斷銀灣七夕期總爲生前太賢淑全
家雪涕寫哀詞

公子秦川對酒豪江樓愁度可憐宵侯嬴曾作氤氳使應
爲良緣續玉簫謂青甫同年

仙山難得返魂香羽士招魂亦渺茫只有壯懷銷綺麗新
詞疊賦買陂塘夢玉詞中買陂塘二
闕極見經綸懷抱

流水沄沄喚不迴馬蹏蹏躑躅上金臺爲君惆悵古君貴韓
偃香奩宰相才

寄題朗玉兄湘煙小錄後

太倉顧登衍春洲

七

聽雨聽風萬種愁空江淼淼秣陵舟蒲帆影待河干卸環
珮魂先月夜游憶舊事過還剩夢傷心人總不宜秋劇憐
烏鵲填橋夕無復憑肩看女牛

記隨徐淑伴秦嘉同奉蘭羞詠白華侍疾勤調瓊杵藥繙
書寒鬥玉鑪茶朝雲慧業由前世絡秀高風近大家似此
國香偏短命神傷豈爲六朝花

應是彈璫王子登暫完小謫便飛昇二分月冷雲初散一
箭蘭凋露尙凝翠水何年逢玉女青山終古黯金陵弦秋
孤館淒涼夜愁絕眞眞喚未膺

詩識無端應楚湘紅襟夢斷鬱金堂何堪水國秋先到從

此天涯草不芳姊妹花殘憐最小海山路阻恨尤長檀奴
自寫傷心詠可但芙蓉號斷腸

舊題影梅庵傳奇金縷曲一詞曾爲閩玉兄所賞今
用原調原韻奉題玉兄香晚樓憶語後

上元 歐陽長海 藥譜

別有傷心曲抵多少錦裁千番珠量十斛葉葉瑤箋和淚
寫寒透唾壺紅玉合早付叅軍蒼鴿香祖樓深空谷遠瞻
影梅菴裡悲重續才子恨佳人福 零星苦語何堪讀况
對此風儂雨慄斷腸驚觸四載璇閨賢又孝淚灑一家尊
屬可也展脩蛾翠綠待擘生綃描不盡疊長歌聊當樽前
哭哀蟬賦倩誰錄

六

香晚主人于歸玉兄曾填慶春澤慢一闋以紀豔緣
茲與玉兄話及舊詞類多語識石城橋畔重送霓旌
感次前韻以當薤露 前 人

書鼓淒煙總帷霏雪送伊如此歸舟君自淒涼無端觸我
閒愁蘭橈親見迎桃葉到而今才幾番秋賸些些綺讖重
提燕子空樓 彩雲莫惜輕飛去便花殘月闕已算香脩

昨夜紅窗有人絮泣紗幮春風難遣羅敷恨况頻年羅隱

狂遊道輸伊四載銀屏百幅銀鈎昨自綉秋水榭歸過賞

樓憶語背燈擁髻淒然泣下附記所言于此

奉題朗玉司馬尊兄湘煙小錄後 上元 周開麒 石生

優曇容易隕秋風金屋銀屏昔夢空添得千秋憑弔處初

秋水樹水關東

空谷幽芳品最幽青溪花史豔香修橋邊紅藥誰為主零

葉飄花我更愁

謂蕊香事見香晚樓憶語

題朗玉兄香晚樓憶語後調寄一萼紅卽送朗玉之

江北

華亭改琦七薊

展雲藍賸傷心憶語依約影梅庵玉樹南朝粉郎東閣脩
來豔福能兼算消過傅紅寫翠曳湘烟蘭笑一開奩脂盃
羅紋巾箱爪印旁有遺簪愁說落花生世竟如絲如縷
抽盡春蠶梵筴鸚提仙裙蝶散者番夢雨重簾積萬點相
思清淚向西風溼了舊青衫偏又客舫聽鴈回首江南

又寫同心並蒂花一幀系以此解前一人

尤

貼梅扇底小眉青露折湘花曉夢醒心力枉拋愁倚屏畫
難成一半兒香魂一半兒影

題朗玉兄湘煙小錄後調寄國香慢

仁和李堂西齋

寫韻樓深每佩聲誤聽屢響追尋塵簾寂無人倚晝自悵
悵曲折行穿花徑怕枝上猶留遺簪孤懷正多感斷續鴻
過細碎蛩吟昔遊渾似夢記將殘燭影纔逗琴心渡江
桃葉傳唱直到如今不道兼旬小別早煖消香散羅衾誰
憐沈腰減倩女魂歸淚也難禁

空谷奉題朗玉兄湘煙小錄後

吳縣曹楸堅良甫

銀雲墜影商絲咽蘭露宵零桂蟾缺香冷秋衾弔蟪蛄一

代紅顏竟長別交枝簇蒂好韶華長板橋東碧玉家瑤簫
吹暖鈿車路二月垂楊二月花花鬢嬌嬾迎春髻傾城爲
想顚房麗密字芙蓉錦繡篇真靈位業神仙記神仙豔福
本三生喚得飛瓊下玉京小院當風羅帶結畫樓聽雨翠
釵聲妬花風雨催花葬藥鑪經卷添惆悵兩漿寒波白下
潮解愁莫問金絲帳掩流蘇冰簟空人天消息太忽忽
幾時白鵝乘烟去何處青鸞有信通沈沈銅漏迢迢夕一
點隄蘄淚一滴嬋娟著述並千秋可人夫婿真憐惜走馬
應官去薊門哀蟬落葉總銷魂吳王宮裏紅心草留作人
間春夢痕

朗玉兄香畹樓憶語瓊思瑤想淒豔絕倫余旣每則

三

僭加評語意有未盡復綴此詩以慰清娛之悼

吳縣董國琛 琢卿

東坡葬朝雲香山遺樊素有情悟無情要皆在遲暮如何
少年場乃有感逝賦孟楷佳公子亭亭而玉樹禮防申自
持花叢嬾回顧青溪最小姑相見眼波注秋漿桃葉迎春
檻蕙花吐堂上明珠珍閨中德星聚葡萄鏡傳神旃檀象
添霧一螺仙掌紋十索錦心句絡秀佐羹忙小喬知曲誤
福慧信無雙燕鶯亦旁妬况聞賢且孝侍疾忘寢寤色喜
動太君肩行隨大婦郎旣小小憐妾亦鸚鵡護誰知歸建
康遽爾痛朝露璧月掩圓輝瓊枝隕寒跼憶語千萬言傷
心事如訴晚君尙有靈應識郎情苦佇續玉簫緣再看銀

河渡

又讀臺城路詞四闋依調奉題以紓餘感

前八

人天儘有傷心境
淒淒况傳遺事墜
葉敲簾餘香賸
盒難
挽青門書記飛仙去矣
又舊夢零星可憐
提起細語喁喁
問君能有幾多淚
言愁吾亦愁
絕翦鐙消夜
讀鑪燼心
字墨碾珠塵編疑粉印
寫盡落花身世纏
繚至此料悔覓
封侯斷腸夫婿曲
按朝陽玉人知也未

奉題小雲兄湘煙小錄後調寄臺城路

吳縣沈彥曾 蘭如

春風曾護雙蘭笑
湘烟化成淒怨豔
豔銷金盈盈載玉未

三

是相逢嫌晚紅閨繡
緩爲替織弓衣贈
郎行遠更揭眉匳
賭吟香語付筠管
瓊枝容易瘦
損舊歡如墜雨
無限悲
惋別緒縈懷
驚魂入夢消息空
江先斷重來恨
滿剩指爪
媽紅枕函留伴傳
寫朝雲黯然疑淚眼

讀朗玉兄湘煙小錄用上下平韻衍成絕句三十首

以寫愴情

吳縣陳彬華 小松

幾夕秋聲撼井桐
無端紫玉返瑤宮
陳思漫續黃初賦
翠羽明璫一霎空

湘水芳枝泣露茸
鉛華淨洗薄芙蓉
六朝婉嬈今消歇
仙謫桃臺第幾重

桃葉迎來上畫艫
配將國士本無雙
如何白下春歸去
不

共秋潮再渡江

名士傾城信有之
初秋水榭證盟時
幾生修到人如玉
記

取鸞綃本事詩

明璫翠羽豔珠圍
瓜步重陽畫幟歸
聞道秦淮諸采伴
鬱

金堂燕妬雙飛

金屋妝成畫不如
同心花朵綺窗疏
可憐香曉樓頭月
空

照流黃閣已虛

家住青溪最小姑
紅妝替寫惜花圖
玉梅香底芳魂杳
羸

得檀郎淚眼枯

揚州三月草萋萋
春色紅橋畫景迷
恰與璫花描豔影
篠

圍環珮盡眉低

愛月還輸雨更佳
垂簾晏坐聽空階
慙慙骨損香桃瘦
不

是傷心怨紫釵

松楸感念雨花臺
一葉凌風江上回
生怕分飛腸欲斷
教

郎兩日故遲來

玉鏡塵封寂寂春
楚湘煙雨夢前因
傷心最是環花閣
少

箇金釵問字人

天風吹散美人雲
瘦賸蛾眉月二分
回首綠梅窗下坐
可

堪重說驗螺紋

縹緲空招倩女魂
碧梧庭院月黃昏
生憐四闋臺城路
半

是啼痕半墨痕

撫棺一慟劇辛酸
碧海青天恨萬端
聞說隔江書遠寄
尙

將好語報平安

此日珠難合浦還空留鈿盒憶風鬟前身定是司花使清

淺蓬萊水一灣

禱疾慈雲大士前替郎茹素祝延年慈姑愛悼彰賢孝小

傳琅琅字二千

祖庭白髮嘆蕭蕭曲意承顏藥裏調難得齋心香一瓣滿

庭風露立中宵

閨中大婦愛娥媼詠絮聯吟翡翠巢五月江深寒水閣花

戩重疊記傳鈔

封侯夫婿領弓刀問疾寒閨不憚勞相伴藥鑪淒擁髻曉

來懶自沐蘭膏

林下風姿謝綺羅紅牙小拍憶秦娥每從官閣飄鐙夜指

點霓裳一曲歌

璧月瓊枝萼綠華如雲鬢髮麗盤鴉癡情綰就來生結翠

盒同裏並蒂花

塢影園空弔夕陽總帷蕭瑟晚風涼西冷築就蘼蕪塚一

樹棠梨傍菊香

桂旗蘭旆返瑤京靈鵲填橋控馭迎夢裏蕭郎成永訣蘭

陵舟夜珮環聲

澹月疎星冷畫屏爲資冥福寫金經應思蝸蝸雕籠愛絡

緯寒蛩不忍聽

征程回首夢觚稜水驛山村露一鐙此日燕臺沙撲面出

門應怕說金陵
返魂無術憶靈脩
贏得全家珠淚流
茶熟香溫相伴處
珊瑚遺挂泣弦秋

月缺花殘感慨深
哀言都是四愁吟
纏綿夢玉詞中句
繪出傷秋一寸心

杏花春雨夢江南
香火因緣禮佛龕
待譜琵琶傳軼事
香名原勝影梅庵

繩牀經案暮垂簾
鸞影淒涼弔鏡奩
只望玉簫來再世
風流佳話定重添

西風葉葉挂征帆
香澤留教伴枕函
好慰高堂珍重意
休將紅淚濕青衫

重讀臺城路四闕
蓉愁蕙怨淒豔絕
倫依調奉題用

西風周清真韻

前人

淒涼譜出銷魂句
秋心况逢秋晚楚
澤孤芳湘皋小影可
奈西風催翦珠匳
故掩正香晚樓頭
夜長銀篋認是魂
歸繡簾人悄問誰
卷青溪舊時打槳
指山溫水軟金粉
無限壁月難圓
璫華遽隕只恨輕
帆孤轉梨雲夢遠
賸雪盈冰桃總幃
長薦畫裏眞眞尙
愁眉翠斂

題朗玉弟湘煙小錄後

吳縣沈秉鈺式如

紫鳳長離玉化煙
杜蘭香去定生天
愛緣結得全家福
第一尤難大婦憐

淵魚廩鼠察非宜
異語時逢藥石規
情重韋皋勤禮佛
玉

簫應有再來時

奉題小雲司馬尊兄湘煙小錄後

上元張

樂子瀾

明珠無價玉無瑕門掩櫻桃五樹花樂府紛傳中婦豔橋
梁側近小姑家坤靈扇早氤氳定忉利天應笑語譁何事
罡風吹霎過便營香冢葬琵琶

一角紅樓舊曝衣闌腰窗眼易斜暉淑姬每告雙雙至游
女能歌緩緩歸無復靈琰重奏曲可憐片石獨支機丹青
不惜生綃費翠羽明璫畫宓妃

螺北香東秀色餐明明佳月有團欒刻脂銷得檀奴愛好
粉能教竹母歡異體連心隨宛轉雙煙一氣祝平安吟紅
閨裏同悽絕數到花枝欠晚蘭

五

小劫優曇悟利那渡江雙楫奈公何招魂自打開頭鼓忍
淚孤擎洗面羅弔烏山應移建鄴愛貓人儻值橫波可堪
老對紅心草來與西施賦輓歌

奉題小雲兄湘煙小錄後調寄金縷曲

上元汪

度鄴樓

共說神仙侶記春人眉修蔣黛目成吳語璧月瓊枝傳豔
影恰伴臨風玉樹彈指散梵天花雨悄綰情絲成百結猛
罡風吹作愁千縷紅藥恨問誰主黃楊閨厄飄茵絮怎
瑤臺優曇一現也難留住應是寒簧真謫降夢繞清虛玉
宇趁鵲駕星橋歸去小別人天成永訣濕青衫望斷青鸞

羽難打槳再迎汝

嗚咽秦淮水料從今豔沉金粉馥銷蘭芷十二紅樓齊掩
泣轉羨落花身世應也爲可人夫婿總帳鏗飄珠箔影認
招魂舊是雙棲地哀榮福問誰比 雙修合惹天心忌早
翻盡斷腸公案綠衣黃裏解脫我爲添轉語水月鏡花如
是况本是玉清仙子消受豔綠三載後更消君一卷傷心
史千古後定傳矣

奉題小雲兄湘煙小錄後調寄臺城路

元和朱 綬 酉生

冷城一片秋楊柳黃昏畫簾微雨笛舫燈圓釵樓鏡墜添
了淒涼無數停辛佇苦算消受年時翠描眉嫵打槳歸來
暮潮不動載愁去 江郎漫成恨賦銅盟人世感芳事多

三

阻綫涩歡稠弦疏怨柱寂寂塵香荃土哀蟬製譜料蕭寺
雲深薜衣吟楚璧月環花此情堪訴與

奉題朗玉司馬湘煙小錄後 琴河錢若璞 蓮因 女史

苧蘿春水浣輕紗人道青溪勝若耶明月吹簫曹比玉夜
船橫笛魏無瑕纖眉翠冷初三月寶曆紅銷第一花愁絕
彩鸞雲影散招魂仍傍舊兒家

錦瑟無端散舞裯玉簫有約証蘭因落花生世難銷劫流
水年華易感春芳樹畫闌閒聽雨碧紗小榭黯生塵冰綃
重寫崔徽影生恐離愁易帶顰 余曾背寫曉君惜花小影 今司馬更屬摹香曉樓坐

月圖 故云

奉題朗玉弟湘煙小錄卽送入都 琴河 歸懋儀 佩珊 女史

春帆桃葉渡江雲官閣梅花月二分每翫琴書怡翠黛自
安荆布薄紅裙致歡顏解承堂上侍疾身甘替女君愁見
弦秋孤館裏鴛鴦遺挂異香熏

閨閣全才似此難檀奴那怪淚頻彈雙修福慧緣偏短四
載繁華夢易殘歸棹豈知成永訣翦鐙曾記話長安祇今
風雪朝天去誰與熏衣護曉寒

題小雲兄湘煙小錄後

元和 顧千里 澗蘋

紫君萬事足所少獨年壽正同優曇花不許見衰醜昔者
漆園論寓形無暫久殤彭理且齊百齡其何有况乎傳憶
語香名滿人口詎等泥蓮記踔越自不朽題詩寄司馬應
更醉卮酒魂兮儻歸來亦許斯言否

題小雲兄湘煙小錄後調寄臺城路

吳縣 戴延祚 竹友

人間儘有傷心史香名幸逢才子銀燭光中玉梅影外春
占妝樓十四亞枝最麗記姊妹花開妬伊連理打槳迎來
宜顰宜笑舉家喜 嚴閨幾番侍疾况封侯壻遠常罷梳
洗扇影分鸞釵痕蝕鳳裙挽留仙無計星河影底恨天上
佳期閨逢今歲直得思量楚蘭吟卷裏

題小雲司馬湘煙小錄後

宋 鎔 悅研

乞得裴航玉杵來藍橋有路卽蓬萊紅羊小劫偏成夢翠
羽聲聲喚不回

曼陀小篆祝深宵千里慈闈問疾遙親算已延兒算減香

魂空向秣陵招

林下風清禮導師羅幃玉漏夜敲詩祇今香晚樓頭月曾
照分牋咏絮時

可人夫婿是秦嘉三十工愁鬢欲華不耐哀詞歌子夜藥
鑪經卷送生涯

題朗玉詞丈湘煙小錄後調寄臺城路

南康 謝學崇 椒石

珠宮多少鴛鴦牒偏教豔才天妬蕙晚煙寒蘭樓玉瘦賸
有淒涼詞賦芳華細數縱題徧鸞綰萬千孤負比似朝雲
髻鬢空咏散花句 紅橋猶記舊事星星能替月同聽簫
譜抱影支愁扶香續夢早自魂銷秋語催歸雁艣頓望斷

銀灣縵袞仙去怪底江潮近來聲更苦

奉題朗玉兄湘煙小錄後

仁和 葛景萊 蓬山

梨雲夢影柳絲輕紫玉飛煙返太清懺盡情根消盡恨好
從香界證前生

水軟山溫豔六朝渡江桃葉話紅橋只今東閣梅花夜愁
聽珠簾按玉簫

